


A. F. MERRILL.
TURA, ASSAM.


A·CHIK GOLPORANG



DHORONSING K. SANGMA

1939

Dictation part of language Exam
indicated on page 15 -



JA·PANG KATARANG

			JAK
Dipblokmung Makre	I
Mongmamung Chibrim	2
Abisa A'ba Tua	3
Chipu Na'katok	4
Do'uang	5
Seng'watumung Makre	5
Do'kuamung Mese	7
Nonoimung Chenggari Abisa	8
Do'pomung Apingga	9
Dipblok Janggalripu	10
Sadusa Ma'drang Sakbri	11
Ku'simpel ba Matcha	12
Kawatte	14
Mongmamung Okupu	15
Matchadu Matchabet	17
Gonggongsingmung Makre	18
Paningsa	20
Dimre Me'chik	21
Do'pilgimmung Do'mesal	22
Gap	23
Peru	24
Do'bimamung Do'bipa	25
Peru Goka	25
Chipu Nokma	26
Seppal aro Gil'mat	27
Cha'pretgipa Me'chik	28
Matchokmung Se'el	29

	JAK
Do'po	29
Do'de	31
Mikkol Bak I	32
Mikkol Bak II	34
Mikkol Bak III	39
Mikkol Bak IV	41
Mikkol Bak V	42
Arotatot	45
Salmung Jajong	47
Ambi Jakbrik	48
Sadusa Sakgni	49
Wa'al	51
A'ba Tua	52
Dajipmung Danggo	55
Ambare Segin	56
Game Cha'gipa	57
Mat An'chi Pila	59
Do'bokmung Peru	60
Me'mang	60
Ang'ke	61
Depanteko Dingdingani	63
Demechikko Dingdingani	63
Mitam Aganme'apaanirang	64

DIPBLOKMUNG MAKRE

Changsao dipblokmung makre ripeng kagrikachim. Sal sao uarang na·tok makkal dokna ku·mongaha. Re·chakatnasion, Makkala baosa ripeng? ine makre dipbloko sing·aha.

Makkalde angon badita! ine dipblok aganchakaha. Indaken uarang ripengsa kok ole chibimaona re·angaha. Chibimaona sokna skangan dipblok ripengtang makreko boltong sote ra·jolchina ge·etaha. Makreba boltong sote ra·jolangaha.

Mangsonga chibimaona sokoa uarang wari tu·a, na·tok bang·ako niroroaha. Wariko man·oa, dipblok ripengtang makrena aganaha, Anga chining napangna, na·ara ianon dongsoe angni chiningoni nadobaon, ia boltongchi angni janggilko ka·sne ka·sne doksobo. Indine agane, dipblok chiningchi napangaha.

Dipblok nadobaanti makre janggilo doksobebeaha. Unon dipbilokoni gipok gipok dake bisi ong·katenba wari gimikan gape, na·tokrang uko ringoa, bang·en siaha. Unon makremung dipblok ua na·tokrangko rim·e chimongoa, kok sa ong·pile man·aha.

Atamoa uarang na·tokrangko suale ra·enba noktang·tangchi re·angpilaha. Ramajoljol makrede ripengtang dipblokni kamna aiao inmane chanchijoljole re·angeng·achim.

Makkal doke man·gimin na·tokrangko bon·manaoa, makre an·tang jikgipana aganaha, Hai, an·chingba da·alde chibimachi na·tok makkal dokna.

Makkala baosa? ine jikgipa sing·aha.

Makkalde angon badita! na·asa na·tok olbana kok balko ole re·aibo ine segipa aganaha.

Makre ko·tip kadoreke, atte ripee, sosoiget soiget, mese ki·me gol·riket ine ku·simike, jikko skang wate chibimachi

re·angaha. Chibimaona sokangna skangan makre ramaoniko boltong sote ra·angaha.

Chibimaona sokangoa, wari tu·kala, na·tok bang·kalako niamaha. Chikosakchi am·doange indakgipa wariko nikahaoa, makre jikgipana aganaha, Anga chining napanggan; na·ara angni chiningoni nadobaantin angko doksobo. Angoni gipok gipok dake ong·katjaskal na·ara doksoengbone. Indine jikgipana agane an·tangde chiningchi napangbebeaha.

Segipani agana gita jikgipa segipani chiningoni nadobaantin bil kakket kakket boltongchi doksoaha. Adita doksoon segipani sko brete taning ong·katbaenba chio gipok gipok nikpilaha. Unosa jikgipa dokako dontongaha. Da·nang! segipade sko brete, sre ong·kate sienba balbopilaengaha!

A·gaona gakatbaboaha, mainasa chion jroe rochaenga? ine jikgipa chrike okamataha. Pil·nipil okamoba re·bajanasa, maiban ong·ahama ine chanchie, jikgipa jroange segipako a·gaona saldobaoa, segipani sko brete, sre ong·kate siakosa nikaiaha.

Jikgipa duk ong·bee, grap grape, na·tok ole ra·na ra·bagipa kok balo segipani manggisikosa olangskae noktangona re·angpilaha.

Ma·sichenggija gipinni kamko ja·rikpaania an·tangna gimaanikosan ra·baia.

MONGMAMUNG CHIBRIM

Changsao mongma jiksesa badiaba burung damsako re·angengachim. Unon uarang chibrim mangsani an·tangni jikgipani manggisiko gope galna ine saksan de·tome ra·angengako nikaha. Mongma bipa chibrimko chonniko aganaha, Nio nikrakgija, rim·o man·rakgija·mangmanga jiktangko gope galna ra·angnade ampa·akonke!

Amjaoba jiktangko sana nisipakugen inesa dakpaenga na·a ine chibrim aganchakaha. Haida, na·ade ang gitamangba daknan amenga amjaenga!

Indinako knae mongma aganaha, Angko chonnikama? Angni jikgipa gita mangbongani manggisiko rang·sani de·tome gope galbo ine inoba anga man·genchim! Chibrimni chonnikako man·e mongmade ka·onangan gape, chibrimna an·tangko mesokna ine jikgipako wagamchi su·e siataha. Unon chibrim gita gope galpana ine jiktangko an·tangni janggal kosakona gatna ine de·dooa amjaha. De·tomna joton ka·taitai nioba amjaha ine nikoa, ua manggisini sambao sintie grape dongaiaha.

Untalsa mongmara, Angnade chibriman bilakbata ine chibrimna kenna a·bachengahana. Uni giminsa da·ona kingking mongmarang jeko cha·oba, chibrim dongengnaba donga ine kenchake, dokchichie gochichie galchengesa cha·a ine A·chikrang agana.

Biltangko nichenggija gaora de·na nangja.

ABISA A·BA TUA

Wal sao Noremung Dimre abisa mina a·ba tuengachim. Uamang mikrake dongna man·na gita gongminako doke roengachim.

Gong gegong ang·ke grong, gegong,

Bil·ik kambe gongritchong, gegong,

Den·na dako taprikong, gegong.

Mia misi rimitak, gegong,

Ang·ke ja·si ja·ritak, gegong.

Matcha iako knaenba uamang·ni turaim borang kokkimao dimrim dimrim dake chrokeaha. Ku·nengana gongminako dokgija dontongode, matchara uamang abisako chike cha·na ine borang jang·kiko rikkak rikkak ine maldoangaiachim. Una gongminako dokat-

taiode, a·china ong·onen matcha chroktaiachim. Uni gimin uamang abisa bodol bodol gongmina doke on·chaen, neng·amung kenamung amchakangpiljaengahachim.

Abitang Nore nogipana aganaha, An·ching matchaoni jokna maiba chol mingsasikkode dakna nangen. Indine nogipa Dimreni gongmina doke on·mitingo abitang noksik nokbak am·e nioara akkaru mina rongsako nikenba, uko chu·dapo gope, ua minkujana kingking gongminakon bodol bodol doke on·angkuaha. Akkaru minaha ine nikahaoara, nokdechol gita a·achina uko galonatenba, rang·san, Aiao angdede! nono, aiao angsade! abi, a·achina ga·akangjoke ine chrika daktokaha. Maisa nono cha·boda! Haida, abi re·boda! ine grapa skima dakaha.

Unon matcha mande ga·akbebebaaha ine chanchienba, rang·san chagrope akkaruko chikgropaha. Akkaru ding·beani gimin matcha ku·sik gimik kamako man·e mikowel·wele siaha. Indakesa uamang abisa ua walo matchaoni jokaha.

A·sel ong·nasion sinteaigija jokani cholko am·na nangchong·mota.

CHIPU NA·KATOK

Changsao patigipa ra·rongipa pilak chipurangko ok·amattoke, mangantinan kraa gita bisiko suale antie on·tokahachim. Chipu na·katokba an·tangna sualgimin bisini bakko ra·e songtangona pil·baengachim. Ramao ua chibima tipchangao na·tok bang·beako nikaha. Ua namen mikbokbeenba bisitangko an·chengo done na·tokrangko cha·aha. Ua na·tok bang·ani gimin cha·a suk ong·en an·tangni bisi donakode gualpilaha.

Indakmitingo chikosakchi mikka jimbee waani gimin chi rang·san dal·bae, chipu na·katokni bisi donako bal·pakangaha. Ua bisirangko chikamachi donggipa na·senchi, gomom, gagol, magilrang cha·sotokaha. Indakesa uaranga bisiko da·ona kingking man·tokaha ina.

Cha·man ringmanosa chipu na·katok noktangchi re-
angpilna ine an·tangni donanggimin bisiko am·aha, indiba
man·jaha. Ua duk ong·beesa jakari noktangchi pil-
angaha.

Mikbokachi manderang man·giminkoba gimaatronga.

DO·UANG

A·chik pagitchamrang do·uang mikoana kena; maina
do·uang mikoode mande sia ine uamang bebera·a. Uani
gimin indake aganani gnang. Do·uangara nawangmung
me·mangni rama cholbibrao nokpantee jamsirenge
dongachim. Sigimin manderangni janggirang ia rama
cholgnioni chol sasik gita nawangni songchi, ong·jaoba
me·mangni songchina, re·angna nanga ine A·chikrang
bebera·a. Indake pilak sianggipa manderangni jang-
girang ia do·uangni nokpanteko re·paknan nangaiachim.
Ia nokpanteko re·pakangmitingo uarang pangoneko srak
srak ine nangbake re·na nangachim. Ia gam·ako knarike
do·uang, Sani se, sani jik, sani de, sani saa brangbara?
rimebo salebo wai ine aganwatatronga ine ina. Uan
an·chingni ouang ouang mikoako knaronggipa do·uangni
mikorongan ong·ana.

Ian do·uangni mikobewalsan ong·aioba, A·chikrang
da·alona kingkingba bebera·e kenengpiti. Uko basakoba
basakoba do·memang ineba minga.

Kragija bebera·e kenaniara gokarangni kamsan ong·a.

SENG·WATMUNG MAKRE

Skang, changsao seng·watumung makre ripeng kagrike,
duk sukni salrangoba, dakchakgrike rogrik re·grikrong-
achim.

Sal sao makre ripengtang seng-watko migital cha-roechina okamataha. Uni gimin seng-watba an-tang jik dedrangko rimbite ripengtangni nokchi re-angaha. Makre ripengtango wak matchu doke, chu mi on-e, cha-at ringataha. Sal gni wal gni cha-a ringani ja-mano, seng-wat noktangchi re-pilna chanchiaha. Indiba re-angna skang ua ripengtango an-tangchi basakoba migital cha-eskachina aganangaha.

Seng-wat noktangchina re-na re-chakaton walangengahani gimin ripengtang makre una bilchamko tarie on-ataha. Indiba seng-wat aganaha, Bilcham nangjawaea, ripeng, angon bilcham donga. Re-nahane ripengne ine agane, salam ka-e, an-tangni ki-sango donggipa wa-alko ching-ate re-angaha. Makre uko nikrike aiao inmanaha. Maikai ripengde ki-sango wa-al kabite re-na man-a bia? ine chanchie dongrikaha.

Manchia sal sokon, makreba an-tang jik dedrangko rimbite ripengtang seng-watni nokchi re-angskaaha. Seng-watba an-tang ripengtangna wak matchu doke, mi song-e, chu cheke on-soaha. Uarang sal gni wal gnina kingking cha-a ringaha.

Cha-jok ringjok, ripeng, da-ode chingaba noktangchi re-naha ine makre aganaha.

Atcha ripeng, re-angbo, indiba da-o walangaha; bilcham so-e nate re-angbo.

Wa-al nangjawa na-a ripeng, angon wa-al donga ine makre agane jik dedrangko rime re-angaha. Adita re-angon andalahani gimin ramakon nikangjaengahachim. Uni gimin makre ramao saniba mi song-e cha-angani wal-kiko ra-e, ripengtang seng-watni daka gita an-tang ki-sango kabite, ki-sangtango gong-get gong-get dakate re-angaha. Dikdiksa re-angon ki-sango wa-al kamakon chakna man-angjajok; indimangba saknaako chakchiken re-angdrakuengachim.

Indake chibima damsako batsotna nanggipaona soko saako amchakjae chio asongsimaha. Unikoa wal-mindik, saako chakchike, grapsi mikosi dake nokona re-angaha.

Nokona jenetene soke ki-sangtangko nioa, ki-sangde kamretretan bon-jok. Indakesa da-alona kingking makrerangni ki-sanga wa-al kamani gita gitcaka ine agana.

An-tangni bilni nalsachiko dakdraode duk man-a.

DO·KUAMUNG MESE

Skang chasongni salrango, a-o malgiparangmung sako bilgiparangni gisepo mamung bobil ong-grikani dongjachim. Uarang nangrimgrike, ripeng dakgrike dongachim. Indake sal sao do·kuamung mese ripeng kagrikna ine ku-monge ripeng kagrikaha.

Sal sao uarang meseni nokgil sreko damsan romitingo tik nigrike kni chitgrikatna ku-mongaha. Do·kua mesena aganaha, Ripeng, angko skang tik nichenge kni rokchitatchengbo, intango nang·ko dakatskana.

Meseba ripengtangni agana gita dakna kusi ong-aha. Ua ripengtang do·kuako tik niate, to pilate, chirengbitbit dake, kniko rokchitataha. Aiao nitobejok, ripeng! Saoba saobarangde nang-nade mikchapilginok ine etale roaha. Da-ode angko tariatskaboahade, ripeng, ine mese aganaha.

Ra, angchi janggal ite asongboda ine do·kua aganaha. Unon do·kua aratenba, meseko tik niata, kni rokchitata dake, kniko reprepe donate aganaha, Ripeng na·aba nambejok; kni sakosa kni ro·batroroa ina. Uni gimin anga nang·ni kniko sakataha, ripengne ine do·kua aganaha.

Mesede do·kuani tol·akon bebera·e kusi ong·e gol·getget dakakon donpaijok. Indakesa meseni ki·meara da·onaking gol·getget dakaijok ina. Indiba do·kuade mese name tariatahani gimin da·ona kingking chirengbitbit nitoe dongengana.

Ripeng kagrikoba kakket ong·grikosa namgniko man·grika.

NONOIMUNG CHENGGARI ABISA

Mande saksani demechik sakgni gnangchim. Uamang-
oni nogipako Nonoi, abitangko Chenggari mingachim.
Uamang-ni ma·a paa siangahachim. Abitang Chenggari
nogipa Nonoina ka·sae dakrongbrejachim; indiba nogipade
abitangni katako manibeachim.

Sal sao abitang Chenggari misi ake, jo·e su·e, song·e rite,
donsochina nogipa Nonoiko ge·etangaha. An·tangara
a·brenghina a·a gamna re·angaha. Uamang abisara
a·dalo dongengachim. Je misiko abitang ake su·sochina
aganangaha ua misiara ong·pokpokaengpitichim; maina
unomiting misi ong·baani sal sa ong·aengpitichim.

Nogipa Nonoi abitangni ge·etanga gita misiko kera sa
ake nakaha. Nakman·o jo·tokenba, su·e choe nioara, misi
birongkon rongsaba man·jaha. Pilakan cha·che ginde
dakesa tang·pronge katangaiachim. Nogipa namen ja-
jrengbeaha. Ua sa·am sako choe nitaioba, misi birongan
dongjachim. Uni gimin cha·che ginderara ong·oba,
abitangna kene ukon song·e donsoaha. Mi bijakko sae
ate donangenba, an·tangde aujole chi ko·jolna chidarechi
re·angaha; maina salba da·o napangahachim.

Nogipani chichi re·angmitingo abitang Chenggariba
a·brenghini sokbaaha. Nogipa misi ake song·soama
song·sojama sandie nioa, misi bidang aro misi jo·e su·ani
chinrangko nikaha. Una mi cha·naha ine mi bijak
saangako onggareoniko ra·one nioa, cha·che ginderarakosa
nike namen ka·onangbeaha. Chenggari Nonoiko an-
tangde misi birongko song·e cha·e unasa gindeko song·e
donsoaha ine chanchie, Da·mo, re·bakuchina ine ching-
soaha. Indiba da·nang! indakede ong·pajachim; maina
misi birongan dakkujachim.

Nogipa au miksue chiko kokchengo ole nokona re·baaha.
Chite onsrappijan, Angara wakma, angna cha·che gin-
derarako song·e donsoara? ine abitang saienba, salruru
salmitale am·bol ja·gnangchi nogipako dokbeaha. Nogipa
pilak katarangko graptaitai aganahaoba, ua bebera·jaha.

Na-an cha-tokaha, skal, ia nang-ni song-soakoba na-an bon-e cha-tokbo inenba nogipako uni misi song-soachin goblekaha.

Angaba cha-ja abi, na-a namnikode jaktangchi ake su-e nibo ine nogipa aganaha. Indiba abitang bebera-jachim. Uni gimin nogipa duk man-an chakna dongna amjae, abitangko aganaha, Abi, na-a angni aganako bebera-na amjaode, angni okko raprake nibo. Unon angni oko misi dongama dongja na-a nikgen ine nogipa grape aganaha.

Abitang nogipani katako bebera-jan baksa ka-onangan amchakjae, nogipani okko ketalichi ratponge niaha. Da-nang, ua nogipani oko mamungkoba man-jaha.

Unosa Chenggari, Aiao, gose! nonoa, cha-pajachim! ine skime, Nono wai! nono wai! ine grapaha. Untalsa da-ona kingking chenggarirang misi ong-kari minkario, Nono wai, nono wai ine mikorongenga ina. Saoba chenggariko rim-e niode ok rapongani parikoba nikgen.

Ka-onangako rang-san chu-sokatna nangja.

DO-POMUNG APINGGA

Bol pangsao apingga ma-ningsa ba-e, grang ki-me tarie roengachim. Unon bachiniba do-po mangsaba bilbae, uarang baksa ba-e roepaaha. Do-po apingga bi-sako nike namen namnikbeaha.

Aiao! nang-ni bi-sa ba-ade ba-nang chi-nangbejok, da-nang. Mikterokrok, ku-bandikdik, simchirengreng, ba-e ropanagitik, rime kal-aknagitik dakaia, da-nang. Maiko cha-e, maiko ringe, indake name ba-na man-tokasai? Angni de ba-paasai! Bilsa sao ba-paaba mikel-onglong, bilsa sao ba-paaba miktinggakgak dakakosa ba-manaia!

Na-ara mainasa nambee ba-pajajok? ine apingga aganaha.

Mikkang bilsiode angaba, ba·e ropanagitikan, rime kal·aknagitikan, ta·ma mikroka gita, geda giloka gitasa, ba·skagen ine do·po apinggana aganchakaha.

Bilsu gipinoba apingga do·po aro uni bi·sarangko niketaiaha. Maisa do·po, nang·ni de ba·ade da·oba skang gitan mikelonglong, miktinggakgak dakaiake! ine apingga ka·dinge roaha.

Oe na·a, adatang abitangrang angni dongjamitingo mikilrangko okreke rotokenba mikronkon chonatna man·piljae apsan ong·taiajok ine do·po apinggana aganchakaha. Kari bilsu soktaiosa namprete ba·srangaiginok ine agane, do·po kratcha·e apinggaoni bile katangaha.

Bilsianti karianti bi·sa ba·taitaioba, apsan ong·aiani gimin do·po apinggana aro gipin do·orangna kratcha·e, salo salode bolkolo, ba bolgrimo, dongnue walo walosa ong·kate cha·amaiaha ine agana. Untalsa da·onaking do·porang salo ong·katgija walosa ong·kataia ina.

Kamtangko mikkangchi nambate dakginok ine aganeba, apsan namgijako daktaitaianikon, Do·po de ba·a gita ine aganronga.

DIPBLOK JANGGILRIPU

Skangode dipbloka janggil ripugija aro sre min·dugija nitobeachim ine agana. Indake, sal sao dipblok Misi Susimema, Saljong Bearemako ma·a paa dakna ine Misi Susimema, Saljong Bearemani songchi re·angaha. Sokangoa ua an·tangni mangsonge re·baaniko uamang·na aganaha.

Misi Susimema, Saljong Bearemaba kusi ong·en ra·chake wak mangsni, matchu mangsni doke, chuko miko sal sui wal sui cha·dil ringdilaha.

Ringa cha·a matchotman·oa, dipblok aganaha, Ama Susimema, Saljong Bearema na·simangba jagital jateng·rako, te·gisim anggal so·ode angni nokchi jamchiba

roange doange niskabone. Indine agane dipblok songtangchi re·angpilaha.

Dipblokni manchia sal sokahaon, Misi Susimema, Saljong Bearemaba dipblokni songona re·baaha. Dipblokde an·tang nok jam, cha·na ringna dongpajani gimin kratcha·e, jaksi chike a·kolo nape dongnusoaha.

Misi Susimema, Saljong Bearemaba dipblokni songona sokange, O angde dipblok, O angsa kakakpru ine okamaha. Pil·nipil changni chang okamoba, dipblok, olok olok inesa a·koloni aganataiaha.

Uni gimin Misi Susimema, Saljong Bearema ka·a gape, bika chae, Da·ontal na·a janggil ripuaigen, sre min·duaigen ine sao on·e re·angpilaha. Undipetsa da·onaking, Dipbloka janggil ripua, sre min·due ku·mangija gita dake ku·rang gam·a ine agana.

Dipblokni kam gita dakakon, Gipinchi do·de gitok, an·tangchi ki·sing gitok ine manderang aganronga.

SADUSA MA·DRANG SAKBRI

Skang chasongni salrango anti cha·ani biaprang namen chel·beachim. Badiaba badiaba songrangoni anti cha·ram biapona sal bri sal bonga dake re·na nangachim.

Changsao badiaba songoni sadusa ma·drang sakbri Toja, Geja, Minja, Doja minggipamang antio palna gita adita bosturangko koko ole antichina re·ongkatangtokaha. Uamang sal bongana kingking re·ange, anti cha·ram biapona sokangaha. Bosturangko pale man·gimin paisarangchi do·o, do·gep, do·bokmung ma·manti bosturangko bree songtangona re·batokpilengachim.

Rama re·bamitingo kosakchi mikka jimbee waahani gimin chi dal·kimongbaaha. Uamang dal·amung tu·amung ta·rakamung dakgipa chibima dilsako batna nangachim. Jal·ang dongjachim. Maikai batgen chanchigrime nion cholkon nikjaengachim. Sadutang dal·

batgipa Toja aganaha, Hai an-chingni jilna ra-bagipa do-geprangko chio watatchenge nina. Do-geprang batangna amama amja nichengna. Do-geprangkon mripjaode an-chingba batna man-pagen ine aganenba do-geptangtangko kacharagoniko watattokaha. Do-geprang kusi ong-bee jroangtokaha.

Uko nike sadusa ma-drang sakbrian, Aiao, chiara ba-sranga, do-gepkon mripja ine agane, kusi ong-e koktangtangko ole chibimako batskelangtokaha. Chiara ba-bea ine chanchie simsakgija re-angtokaiahani gimin, chi uamang-ko mriptoke, jroe, katpanara changtokjae, sitokaha.

Gisik grini kamara sianiko grongninga.

KU-SIMPEL BA MATCHA

Skangni manderang bi-sa atchion, manderangko siatna man-gipa pilak ma-malrangan, sani palo ga-aka uko uina gita atchichakgipa nokni nokkimachi amra ansoa re-su chaksoa ine bebera-achim. Mandeko mongma dokode, atchichengon mongmani anchakgipa amrao ga-akea ine bebera-achim. Indakeba maibani jakchi siode, Uni amra anao re-su chakao ga-aka ine inachim.

Changsao Chireni segipa Geng antichi re-angenba, anti cha-mano songtangona re-bapilengachim. Indiba songona sokgijan walchange, rama sambao donggipa giting ja-pango waltuaha. Adita waltinganon, maiba maibarangni birangko Geng knaaha. Indiba ua bachi mai chong-mot ma-sijachim.

Un walo me-chik saksa demikkang niknasiengachim. Uni gimin pilak siatna man-gipa ma-malrang amra anna re-su chakna ine ku-monge re-angtokengachim.

Mapil mangsaba amra anpana re-su chakpana ine Gengni tuenggipa rama gitan re-pakbaaha. Mapil giting

bolo sing·aha, Na·ade saksa me·chikni demikkang niknasiachi amra anpana re·su sachakpana re·pajama?

Giting bol aganchakaha, Angade re·pana man·jawa; maina ango sokgipa gngang, uko gale angade re·angna man·jawa. Indiba ka·sapae angni amra re·sukoba anchakpakande ra·angpabo. Re·bapilon sani amra re·suo ga·akaha, ia gitan re·bapile aganpakangpabo ine giting aganaha.

Pilak ma·malrangan demikkang nkgipani nokkimachi an·tangtangni amratangtangko anchak sachaktokaha. Bi·sa atchion, ku·simpl ba matchani amra re·su chakao ga·akaha.

Indake pilak re·bagiparangan songtangtang noktangtangchina re·pilangtokaha. Mapilba giting bolni dongram gita re·angbebeaha. Ku·simpl ba matchani amra re·suo ga·akaha ine mapil giting bolna aganaha.

Demikkang nkgipara sani jkgipa ong·a? ine giting bol sing·aha.

Gengni jkgipa Chire ine mapil aganchakaha.

Pilak katarangkon giting bolni ja·pango dongenggipa Geng knatime dongengachim. Giting bol uona sokgipaan Geng ine uijachim. Geng gisiktango aganaha, Anga mamung dakeba angni depanteko ku·simpl matchana on·jawa. Da·ode anga pilak ong·gnirangko taltokaha.

Geng walgimikan tusinapjaha; ua chanchiari wal seng·akosan sengsoengachim. Walsimsim dakmitingon Geng nokona re·skelangaha. Ka·sne re·ode ramara sal sani ong·engpitichim, indiba Geng ua ramako salbelasanon sokangaha. Geng nokona sokange, Ramao tumitingo an·tangni knagimin pilak katarangko jkgipana agane on·etokaha.

Depante maikai ku·simpl matchani jako ga·akjawa, indake ua an·tangni nokko duulsrange wa·a bolrangchi mitap snina kingking guare kaduule uoni ma·akoba dekoba a·palchi ong·katna on·gija bilsi chi·gnina kingking nokning·on rakkiaha.

Sal sao pagipa depanteko chidareo aue rochina ine an-tangan mil'am sepi ra'e skang skang dile re-dilangaha. Depante chidareo suk ong'e aue romitingo, pagipa gisik rakbeen nitimsoaha. Au miksuman'o depante ba-ra gansreaha. Nokchina re-pilna ine re-chakatangon ku-simpel matcha wa-panggopo timsoe depanteko chagopaha. Pagipa uko rang-san niksoe, sepi chake den-soaha. Ku-simpel matcha ramao ga-ake wagam wakengsisi dake siaha.

Depante bobilni jakoni jokahani gimin, pagipa kusi ong'an amchakjapile depantena aganaha, Baba, an-chingni bobilko da'o amahani gimin ku-simpel matchako ga-tingdate goera de-bo.

Depante pagipani ge-eta gita ku-simpel matchako ga-tingdate, Kai, goera! ine aganaha. Depante mamung nichenggija jeramram ga-tingdataha. Unon depante matchani wagamosa ga-tingdatmane ja-pao matchani wagam bu-soaha. Indake ka-sne ka-sne bisi chipange sal gnini ja-manon ua siaha.

Gaora de-aniara dukkosa ripeng kasikara.

KAWATTE

Sal sao kawatte mangsa cha-amachini noktang a-kolona an-tangko romrome re-baengachim. Kawatte an-tang be-enko kom-totchengesa romrome re-rongachim. Ua ramao matcha mangsako grongaha. Matcha kawatteko chike cha-na sike uni kom-tote romrommitingo chagope chikaha. Indiba kawatteni bigil rikkap rikkap dake rakbeani gimin uko chikna man-jae watpilaha. Maidake chikode man-gen anga? ine on-tisa re-jite matcha chan-chiaha. Indiba ua chike cha-ani cholkon uijaha.

On-tisa ruutani ja-mano, an-tangko chike cha-na am-o man-jae matcha katangaha ine kawatte chanchie aganaha, Matchan goka! angko chikna skode, bia angni mital-

mitingo ka·bako asongjetesa chikpabo, rakgipa janggil-chikosa chikpilajokona baoni man·pana!

Ia kawatteni agana katako knae matcha kusi ong·aha. Atcha, nambejok! an·tangko chike cha·na angni uija-engako uiatjok ine matcha gisiktango chanchiaha. Ua kawatteni kom·tote romromako dikdiksa sengkuaha. Jensalo kawatte kom·tote romrome mitaltaiaha, ua bildape ka·bako asongjete chike cha·bebeaha. Untalsa kawatterangko matcharang chike cha·na uiaha ina.

An·tangni kratcha·gni ba signi katarangko aganjojoe ja·mano kratcha·ani ba sianio ga·akgipa mandekon kawatte ku·dikgila ine agana.

MONGMAMUNG OKUPU

Changsao mongma mangsamung okupu mangsa, mong-mara chikamao, okupuara chikosakchi chibima dilsao, auengachim. Okupuni auatani gimin chikamachi kimongangaha. Chi kimongbaako nike mongma gisiktango chanchiaha. Aiao! sawa chonnik onnik chikosakchi audape chiko kimongatengaha? A·gilsak gimiko angan dal·batgipa aro bilakbatgipa ong·jama? Angko sawa indake chonnikna pa·soka? Nachil saldengdenge watata man·gen biade.

Unon mongma ka·onange chrike inataha, Wai, sawa angna bate dal·batgipa aro bilakbatgipa chikosakchi audape chiko kimongatenga? Chikamao anga, mongma, auenga ine uijama?

Okupu aganchakaha, Anga nang·na mongmana batskagipa; nang·na kniding dingsaba mogijagipa, anga audapatenga. Angni sepangona re·babo, nachil pe·rokroke watatna.

Indinako knae mongma kena gnang aganna a·bacheng-aha, Aiao! a·gilsako angan pilakna bate dal·batgipa, bilakbatgipa ong·achim. Indiba angna batskagipa maia

To be read by a Koro
 for Kistaton on Kungpang & Kham.

bima dongengpitisai! An-tangni uina skako dontongna man-jae mongma sing-ataha, Indide na-ara sawa, mai minggipa?

Anga nang-na batgipa, pilaknaba kengijagipa, a-kol bite donggipa ine okupu aganchakataha. Angni bil aro bimangko uina skode, uake, anga angni kimil chonbatgiparangoni dingsako balpakatenga. Indine okupu an-tangni bu-su ge-sako oke balpakataha. Uarangni jegrikako gipi wakangpade nie dongengachim.

Mongma okupuni kimilko niksoarion rang-san kena ong-kate be-en mopile aganaha, Habab! ian chonbatgipa kimilsa ongode, dal-batgipa kimilde baditan dal-enggen! Uni bimangde pangpang baditan dal-srangengen! Da-siba anga ku-rangko knaarisan bimang chonengen ine ra-bie ropaengjok. Hat, intango ka-onange angko doke-bebeode, angkode bikining biripik nikjawaha. Uni gimin katon jangi jokpakugen ine chanchie mongma ki-me songgetete nipil nichagija, ga-aktaitai romromtaitai katangaha.

Uko nike gipi wakangpa, Jara mongmade dal-mang-mangaia, okupuni togie kimil ine bu-suko on-atakon bebera-e katangaha ine aganrike ka-dingrikbeaha. Mongma jarara banona katgen bia ine niwatoroe ka-dinge, gipi wakangpa ja-rikangaha. Ua ka-dingani giminan mikron nikjapile, rong-brako chagake, su-kimpeka gita ga-ake ka-machini chong-gni aro kosakchini chong-gni wagamsan dongari pilakan betokaha. Ku-chilba ku-grekgrek dake tang-skikaha. Untalsa da-ona kingking gipiara ku-chil gipgija wagam chong-brisan dongaiaha. Un baksaba agre ka-dingbeahani gimin mikronrangba chonchonjolangahana.

Gipinna agre ka-dingstekode an-tangna ong-pila.

MATCHADU MATCHABET

Skangni chasongo matchadu matchabet minggipara, salode mande walode matcha pil-gipa badiaba ma-chongni mande ong-achim. Uamang salode manderangni song-rangchi re-ange, mandeska gitan golpo ka-e ka-dinge roe-rongachim. Indiba walode matcha pil-e manderangni do-o, do-bok, wak, matchu jillarangko chike cha-rong-achim. Matchadu matchabetrang song sa jam sa ong-pilahachim. Iamang-on sepangjolni manderangni jillanirangde bon-pilachim. Uamang sal gni sal gitam re-na nanggipa songrangchinaba gisep gisep re-ange, manderangkoba siatgija rim-e ra-baenba, nokkimatangtango wakko, do-ko gita jille cha-rongachim. Indakani gimin songni manderang namen jajrengbeaha. Mitam mitam songni manderangde nokko jamko waten song chel-arangchi katangpilaha.

Indakako nike Abet minggipa mande saksa chanchi-beaha. Ua maikai matchadu matchabet songgimikkon so-ote galna man-gen, cholrangko am-beaha. Abet matchadu matchabetrangko so-ote galani cholrangko chanchien chanchien bon-kamao mingsa cholko dake nina mangsongaha.

Sal sao Abet te-rik malbik mingiminko palna ine kok sa ole, matchadurangni songchi re-angaha. Matchadurang niksoarin Abet maiko olbara? Abet maiko olbara? ine agane nina chabatokaha.

Bol biterangkoba na-simangba cha-pana sikamade? ine Abet aganaha.

Nang-ni cha-na on-paode cha-pagenchim ine matchadurang agantokaha. Abet matchadu sakprakna rongprak dake songgimiknan tike suale on-tokaha. Matchadurang an-tangtang palko cha-e nioara namniktokbeaha. Uamang kusi ong-tokbeaha.

Abet nang-ni songode indakgipa biteara bang-ama? Bipangara bolma budu? ine matchadurang sing-aha.

Iade bol bite, bipangde dal-amung dakroamung daka, indiba ritchengbea ine Abet aganchakaha. Na-simang namnikode anga bol gimikkon den-pee on-na man-gen, indiba na-simangsa dakchakpana nanggen. Na-simang songgimikan ang baksa re-e, biterang bnekjana gita bolni be-bamitingo uko rim-chaksotokode, anga na-simangna den-pemangmangede on-na man-gen ine Abet aganaha.

Na-a den-pee on-paode chinga rim-chaksona man-gen ine matchadurang ku-rachaktokaha. Abet matchadu songgimikkon songtangona rimbae, bolchu bolma duul mik kolgrik ong-gipako sal snina kingking den-peaha. Bolchu bolma be-angmitingo Abet aganaha, De, da-ode na-simang gimikan rim-chaksotokboho. Unon pilakan chro chro jakrangko songdoe rim-chaksotokaha. Indake matchadu songgimikan bolchu bolma be-jete sitokaha.

Da-o songni manderang matchadu matchabetrangna kenaoni jokahani gimin Abetko mitelbeaha.

Namgniko dake on-giparangni bimungrang sioba tangkua.

GONGGONGSINGMUNG MAKRE

Changsao gonggongsingmung makre do-ona atta sana ku-monge burungchi re-angaha. Ramao makre gonggongsing, Attara baosa ripeng? ine sing-aha.

Attade angon badita! ripeng, ine gonggongsing agan-chakaha. Indake uarang re-angkuaha. Re-angmitingo gonggongsing makreko boltong sote ra-jolchina agan-angaha.

Uarang atta saani biapona sokahaoa, gonggongsing makrena aganaha, Anga atta saegen, na-ara ia bol mitino dongnue do-o nange ga-akbagipako boltongchi doke chimongsobo. Gonggongsing bolchi gakatange, chikareko nione, a-gitokko nisote an-tang okningoni bisringko bikote bol saoni bol saona, cheksi saoni cheksi saona, sring-

batrooangaha. Ripengtangni daka kamko nike makrede aiaø inmanpilengachim.

Dikdiksani ja·manon do·o bilbae saanggimin attao nange ga·akonbabebeaha. Makre do·o ga·akbaa ga·akbaako boltongchi doksoe bol ja·pango chimongsoaha. Ua salo uarang bang·en do·oko man·aha. Atam salni·ahaoa, do·o man·giminrangkosuale uarang noktangtangchi re·angpilaha.

Adita sal ruutani ja·mano, makre an·tang jikgipako do·ona atta sana mong·aha.

Attara baosa? ine jikgipa sing·aha.

Attade angon badita! ine makre wakichengcheng dake ka·dinge aganchakaha. Ua gisiktango gonggongsing gita dakatpaigen ine chanchiaha. Indake uamang jiksesan burungchi jikko skang wate, atte ra·e, ko·tip kadoreke re·angaha.

Atta saram biapona soko, makre boltong sote jikgipana on·e aganaha, Angni saanggipa attao do·o nange ga·akonbagipako doksoe bol ja·pango dandake donsobo.

Unikoa makre a·gitokko batsote, chikareko nione bolkambechi gakatange, ripengtang gonggongsingni daka gita, okningoniko atta bikotna ine an·tang okko raponge, bibikko bikote bol cheksio kaenba, bolsaoni bolsaona bilroroe bingangaha. Bibik bon·ahaoa makre a·ona ga·akonbaaha.

Bak dip inana atta saangao do·o dal·a nangen ga·akba·jok ine chanchie jikgipa boltongchi joljolari re·ange dokeaha. Ja·mano name nioara uan segipasa ine nikaha. Segipade sisrangaha.

Jikgipa grapmanggasie, sinti do·pilgime, noktangchi re·angaiaha.

Pilakko dakna skangba mikkang janggal name nichengna nanga.

PANINGSA

Pekda minggipa mandeo depante saksa gangchim. Uni bimungko Gonga mingachim. Gonga jik kime nok dingtang cha-ahachim.

Sal sao uamang paningsa mi brena kok ole a-jong songchina re-angaha. Miko bree songtangona re-bapilmitingo, uamang bol ja-pango neng-takaha. Depante chi ringna ske neng-takmitingo chiko am-angaha. Ua pagipana aganangaha, Anga chi am-e ringekuna, na-a neng-taksobo. Pagipaba kusi ong-en watataha.

Depanteni ruutbaon pagipa chanchiaha, Anga da-o ontisamang miko man-dapanodechim! Indine ua depanteni kokoniko jakwak gni migilko chin-e an-tangni koko donatskaaha. Depante mamung ra-ani chinko uijana gita namedake tarie donsopilaha.

Depante re-bapilahaoa, ua pagipa uni miko chin-e ra-soaha ine mamung chinkoba uijaha; maina indake dakgen ineba chanchichipani dongjani gimin mamung simsakaba dongjaha. Adita neng-takani ja-mano uamang songtangona re-baaha.

Bilsu bongani ja-mano pagipa sae siangaha. Gonga pagipana matchu mangbrimang den-ate, ganchi rike so'e galaha. Unikoa kima sol-e nokmikkango songe donaha.

Gonga an-tangni songni sepango donggipa chibima rikamo bari damsako dake, uno baring, jal-ik, ta-marang aro adita cha-anirangko ge-aha. Ua, manderangni dakronga gita, matchu sigiminni sko bikrokko ra-bae, bari jatchio go-ol songe sikkroke donaha.

Pring sao songsulni me-chikma saksa Gongsani barioniko sriksrik baring akna ine re-baaha. Baringko akna ine dangtapon, matchu sko aganaha, Wai, na-a maiko daknasienga? Ia baride angni depante Gongsanisai. Na-a cha-una nangja. Nibo! angaba tangmitingo angni depante Gongsani miko jakwak gni chin-en, angko uni matchuo atchiate bilsu snina kingking matchu ong-e gamataha. Anga da-o matchu ong-en sipilaha indiba uni

groan matchotkujani gimin angko da·oba bariko dongtimatkuenga ine aganaha.

Iako knae me·chikma kratcha·amung kenamung dake Gongsani nokchi re·ange, una pilak katarangko tale agane on·eaha.

Pilak katarangko knatokoja Gongsja grape, matchu skoko ra·bae, ganchi rike so·e, mangon mangsenge kema ka·aha ine agane watataha.

Nang·ni ka·sae watahaode, anga re·gnok angde ine jumangchi pagipa agane re·angaha.

Tangmitingo cha·u me·kuode, siman·oba me·mang a·songchi re·angna man·gija matchu, wak pil·e groko chotskana nanga ine A·chikrang bebera·a.

Na·a cha·unabe.

DIMRE ME·CHIK

Gitim damsao Dimre minggipa me·chik saksa gnangchim. Ua mamatang, adatang, noska, abitang, nio sari, songsul nokripengrangkoba mande mingjachim. Uni indake dakani giminan ma·drang gimik, songgimikba namnikjae uni noko rogija gagija galchiptokaiachim.

Adita bilsirangni ja·mano segipa siangaha. Segipani ma·kringa nawang charongachim ba mangcharongachim. Dimreni bakdrang segipa nawang chachong·motgen ine uisoenba, Dimreni pilak gam sengko, atte gitchi pilakkon ra·e kattokenba, Dimrekode segipa baksa nokon kachipchange donangaha. Rua achok mangsa aro ketal bi·sa mangsa mangmangkosan donangaiaha.

Sal gni donani ja·mano segipa mangchana a·bachengaha. Uko nike Dimre ma·drangko aro songsulrangko okame okame grapaha. Indiba saksaba knachakjaha batesa, Gitchichina ine intekataiaha.

Dimre rua achokchi wa·seko grapang den·pruang dakaha. Se sagi mangchae chong·grimgrim dake asongenba, Maina wa·seko den·prue roenga bia? ine inataha.

Unosa ua bate bate grape okamaha. Indiba saksaba uko dakchakejaha. Graprroe salgimik den pruachi an-tangko napginok ine nikoa, chokonprue katna dakako segipa nawang rang-san knitomo rim-rikaha. Indiba jikgipa an-tang kniko ketalchi rasote jenten jokange, mande jinmachi katangaha. Segipa nawang jikgipaoni man-rikgipa kniko ku-bol ku-bol cha-enba, E-ching e-ching, rasin, rasin similachim da-nang! ine aganrikaha.

Jikgipani ja-mano song nokgimikkon so-chipe galeaha.

Nammiting salrango ma-drang bakdrangko aro songsul nokripengrangko name donggrikna nanga.

DO·PILGIMMUNG DO·MESAL

Badiaba changsao do-pilgimmung do-mesal bima mikcha namnikgrike kimgrik donggrikaha. Pilak kamon uarang jik jikna krae, se sena kraen mandera-grike kasagrikachim. A-a gamoba, anti a-kang re-oba, damsandamsan ku-mong nangringrikesa re-a roachim. A-rak ong-ani gimin, mikka wajani gimin do-mesal bimaba miksik gitcak kimil ringrang daken nitoachim. Ja dokna kingking uarang kusi ong-griken dongangaha.

Wachikari sokbaahaon mikka wabaaha, a-arang, uarangni roram burunrang sosie chijimtokaha. A-ba gamoba, songre songbatoba, anti a-kang re-oba, wachi chakna nangaiahachim. Uni gimin do-mesal bimani grangrang, ki-merang, kimilrang sosie chopjuju dakaiaha. Kimilrang, grangrang bo-si bo-dak dakaiani gimin nidik nisi nikaiaha. Segipa do-pilgimni gisiko suk ong-jaha. Ua gisiktango inaha, Skangode ia angni jikgipa do-mesal bimara mikkang nitobeachim, bimang daknangbeachim; da-oara chopjuju, nidik nisi nikajok. Che! angade donggi kimgija gale katsrangginok.

Dikdiksani ja-mano do-pilgim jikgipako gale katang-bebeaha. Do-mesal bima grape mikoe, ja-rik sniloba,

miknagengchi niari penagengchi doksoaiachim. Indake dakani gimin jikgipa ba-ra itchilari, rejak pakkol separi kratcha-e, jaksi chike re-bapilaiaha ina.

Wachi ra-gate do-aran bilbaaha. Mikka wajaha, a-arang, burungrang chiranangaha. Jechi ronaba an-sengbaaha. Do-mesal bimani kimilrang grangrang ran-enba miksik gitcchake kimil chirengbite nitotaiaha. Unon do-pilgim jiktangko nike mikchataibeaha. Uni gimin ua jiktang do-mesal bimako an-tangona re-bapilchina mol-molbeaha; indiba ua re-angpiljaha. Uni gimin do-pilgimni gisiko duk man-e skimaha, Himangai! maina galman piman-jok!

Indakesa da-ona kingking do-pilgimrang Him, him ine ma-ama gita sintea gita mikoa ine agana.

Chanchibewalgija kam ka-ani sinteanio bon-ea.

GAP

A-chik ma-gitcham pagitchamrang gapko Komre Komse mingachim. Ua bolko wa-ko sol-na repna changbegipa ong-achim ine agana.

Uni gimin skangni chasongo Susimema Sangkildomani siani bon-ani salo, mangko ganchi rike so-na gita gapkon ganchini krongko sol-china repchina ge-ettokaha. Indake gapba an-tangni bimangtang jagringtangko nirok nisole ganchini krongrangko grong gonggni gui dake sol-aha.

Ua sal intaltalsa ia salona kingking A-chikrang Susimemani Sangkildomani sianiko gisik ra-ani gitasa, mande sio Kima ine minggipako grong gonggni dake bolko sol-enba noktangtangni mikkango dontokenga.

Namgni dongjaoba, dakbewalko ja-rikkua.

PERU

Skangode peruara salgini achaksa ong·ani gimin salgiosa dongachim. Perukoa salgio donggipa mitesa jille, cha·a raja cha·atachim, donga raja dongatachim ina.

Peruni indake kusi ong·beengako nike do·ka uko miknengbeaha. Do·ka maikai peruko a·gilsakona rimonbana man·gen indake cholrangko am·beaha. Sal sao do·ka peruni sepangona re·ange aganaha, Na·a miteni alduako man·e, cha·a raja cha·enga, donga raja dongenga, beben. Indiba na·a jakgitel ong·e rona re·na man·ja; jakgitel ong·e jeko ska cha·na man·ja. Cha·bo ine on·akosan cha·na nangaia. Angko niboching, anga jechi re·na rona ska jakgitel man·aia. A·o rona inoba, sakchi bilna inoba mamung champengani gri. Indake ong·ani gimin·san anga da·oba nang·ona sokbae, nang·na ka·sachake iarangko agane on·enga. Cha·a raja cha·oba, donga raja dongoba, gipin nokol ong·ode, mamung rasong gri ong·aia. A·gilsak aro salgisakni pilak ma·malrangan jakgitelko am·a.

Peru do·kani agana katako knae gisiko duk ong·beaha. Ua da·o an·tangni ong·enga gita dongangkuna kratcha·nikbeaha. Anga da·o nang baksa re·ode a·gilsako mai namgniko man·gen? ine peru sing·aha.

Do·ka aganchakaha, Ching a·gilsakni an·sengakode maiko agankugen. Cha·ani giminba, dongani giminba, da·o nang·ni dongenga cha·engna batede changchikung nambata ine do·ka aganchakaha.

Uni gimin peru do·ka baksa a·gilsakona loljol re·bapaaha. A·gilsakona soko do·ka aganaha, Na·a da·o jakgitel ong·e dongboaha. Ia mangmangko agane an·tangde bilangaha. Peru iachi uachi re·e cha·aniko am·beaha. Indiba neng·beesa okko gapatna mangmangan man·aiaha. Saloara mandena kena, waloara sin·ako chaka dakesa dongna nangahani gimin peru dongtonik·jabeaha. Uni gimin peru songtang salgichi re·pilna sike, salgichiko nigitoe pring atam anti indake graprongaha,

Mai ong·jok angnade! Rimepilbo wai, ang mite.
Tol·pinakachi amako man·ode dukko man·bea.

DO·BIMAMUNG DO·BIPA

Skang chasongni salrangode, a·gilsakni pilak ma·malrangan, a·o donggipa sako bilgipa pilakan ku·sik agangrikna changachim.

Sal sao do·bima an·tangni tarigimin biapo, an·tangni chanchisogimin gita bimangtangna bate changchikung nitobate demechikko ba·gen ine chanchiengachim. Ba·ani sal soko, ua biaptango bamaha. Adita ruutani ja·mano ua bitchiko rongsa chi·ataha. Do·bima an·tangni chanchisogimin gita ong·ama ong·ja ine nioara, sko ki·sang uigija bo·rotrot dakakosa nikaha.

Uni gimin do·bima jajrengbee, Sko gri, ki·sang gri maiba ong·kata! maiba ong·kata! ine chrikwatataha. Do·bimani kena gngang chrikako knae do·bipa re·ange niaha.

Do·bipa aganaha, Ja·mano ong·gen, ja·mano ong·gen. Unon ua jikgipani kenengako nike uchina sincheporoange uko ka·dimeataha.

Untalsa da·ona kingking do·bimarang bitchi chi·mano chongchangoni bilone, basakobara chongchagon donge gokatekronga. Gokatekako knaahaon do·bipa chaange Go·go·go·ok ine do·bimachina sinchepchepanga.

Pilak dakgimin kamrangni biteko ja·manosa man·a.

PERU GOKA

Sin·karini wal sao peru sin·ani gimin duk man·beengachim. Ua sin·ako chakna man·jae, salgichiko nigitoe, Aiao sin·a! aiao sin·a! ine grapaha. Peru ua

walo sin·a amchakjae chanchiaha, Da·mo seng·kuchina, kwalde angaba bol bigilko kike am·pak doke chinchong·motgen. Ia mangsonganio ua walko re·ataha.

Pring seng·ahaon sal rakbaahaon, sal ding·ani gimin sin·jaha. Indake peru an·tangni am·pak dokna mangsonganikon gualpilaha. Ua kusi ong·e roarisa salko re·ataiaha. Wal ong·taiahaosa sin·taiahani gimin gisik ra·taienba, Knasalode am·pak dokchong·motgen ine mangsongtaiaha. Sal naenba ding·ako man·taiode gual·taitaiaichim.

Indakesa perurang sin·kario sin·a chakna amjae miko·ronga ina. Mitam mitam manderang maiba nangbea kamko dakgen ine agantaitaia indiba dakja. Indake daggipa mandekon, Peru am·pak kika ine inronga.

Dakna nanga kamko dakchengbo.

CHIPU NOKMA

Pilak chipurangna bate chipu nokman dal·batgipa aro nitobatgipa ong·a. Uni gimin chipuni jat gimik uko nokma songtokaha. Untaltal uko uamang mandera·tokaha.

Sal sao patigipa ra·rongipa bisi bijongko suale antie on·na ine pilak a·gimikni chipurangni jatrangko an·tangona okamattokaha. Uni gimin pilak chipurangan an·tangtang bakko ra·na ine re·angtokaha. Uarang chipu nokmakoba an·tangtangmungan damsan re·pachina rim·angahachim, indiba ua uamang baksa re·angpagija aganataiaha, Na·simang chonggipa, remgiparang re·angsobo, angnade nokma ong·ani gimin suale donsoara donsoaigen. Angade ja·mansa ka·sin ka·sin re·angaigen.

Pilak chipurangni sokangman·tokoa, patigipa ra·rongipa, amra ane boltong done, bisi bijongko den·kning den·ripike chipu mangprakna jena jekai kraa indake suale antie on·tokaha. Uarang paltangtango ra·e kusi ong·e

noktangtangchi re·angpiltokaha. Chipu nokmanade sualmitingo mikkang nikjani gimin sualchangaha.

Chipu nokmade pilak chipurangni re·pilangtokmanahaosa an·tangni palko ra·pana ine, ringreng ringreng dake, patigipa ra·rongipaona re·angaha. Biapona sokangoa patigipa ra·rongipao an·tangni palko bi·aha.

Patigipa ra·rongipa aganaha, Na·ara da·osa sokbaane? Baosa, nang·nade sualchangahake! Na·ara jinma re·bamitingo bachi jamanga?

Chipu nokma aganchakaha, Na·a maikai nokmajongjongna sualchangaha? sualchangnan nangjachim.

Patigipa ra·rongipa ka·onange aganaha, Na·a basakoba jada, basakoba seng·a ong·gen; indiba na·a bisikode man·pajawaha. Indakesa da·ona kingking chipu nokmao bisi dongjaha, un baksaba gisep gisep jada dakaiani gimin manderang uko chipu jada ineba mingronga.

Basakoba basakoba manderang an·tangtango dal·gipa rakgipa dake mesokenba, maiba man·gniko man·rongja. Indake dakakon, Nokmana bisi tikja ine aganronga.

Dakna nangako dakchengbo, ong·jaode dukko man·gen.

SEPPAL, ARO GIL·MAT

Skang salrangode seppalara boltongsa ong·achim, aro gil·mat bijakara ramram bolni bijaksan ong·aiachim. Indiba patigipa ra·rongipa chipurangna bisi bijong sualna ine gil·mat bijakko amra anaha aro seppaloara boltong dake bisi bijongko den·kningchakaha. Indakesa seppalba bisi man·paaha aro gil·matoba bisi ma·gapaha. Untaltalsa da·ona kingking seppal nangode, ba gil·mat bijak nangode, sabea.

Namgijana jakkalako man·ode, namgijako man·pagen.

CHA-PRETGIPA ME-CHIK

Badiaba songo Chongge aro Dimre jiksesa gnganchim. Jikse donggrikani bilsi sani ja·mano, Chongge an·tang jikgipa Dimreko nio sarichina misi akjolchina gita watat-aha. Maina misi minkari ong·achim.

Songona sokangahaon Dimreni niotang uko mandera·e, una mi bijak song·e on·soaha. Dimre mi cha·man ringman·o, an·tangni gipin gipin nio sarirangni nokrangchi grongna re·roroangaha.

Dimre nok saona re·ange sing·aha, Mai bijak song·a sari?

Misi rimitak, ang·ke ja·ritak song·a. Cha·panakama? ine saritang aganchakaha.

Cha·gen ine asonge Dimre cha·aha.

Unoni re·ange nokgipinoba, Mai bijak song·a sari? ine do·gacholko niue seng·etaiaha.

Misi sarang, oko rang·rang ine saritang aganaha. Cha·pagenma sari? ine on·oa Dimre unoba adita cha·aha.

Unoniba ua saritang sakgipinni nokona re·ange, Mai bijak song·a sari? ine sing·etaiaha.

Misi jong·su, oko susu ine saritang aganaha. Cha·e nipabo ine on·oa, Dimre asongchong·kome adita cha·aha. Cha·manoa saritang saksani nokchina re·angaha.

Nokona sokangoa, Mai bijak song·enga saride? ine Dimre sing·eaha.

Misi balsat, oko sasat ine saritang aganaha.

Mitimama sari? ine Dimre chadenggol·take cha·taiaha. Unoni bon·kamgipa saritang chongipani nokchina re·angtaiaha. Uamang·ba ma·drangan mi cha·tokengachim.

Nokona sokangoa, Mai bijak cha·a sari? ine Dimre sing·eaha.

Misi nengwa, oko wawa ine saritang aganaha. Cha·e nipagenma? ine on·oa Dimre tuketchie cha·aha.

Ua segipani bakdrang gngang kakketo atam sanon cha·angoa, okde chaktogija dakenba ro rotogija, asongo asongtogija, dongo dongtogija, tuo tutogija dakana, nio

sari gimikna kratcha·e walon songona katbaaha. Indiba songona sokna skangan rong·patalo neng·takmitingon ok brete bibik rurue siaha.

Agrede pilakan namja.

MATCHOKMUNG SE·EL

Badiaba changsao matchokmung se·el besa kagrik·achim. Urang ka·sagrike nangrime dongachim.

Sal sao matchok chiore biteko cha·e ripengtang se·elni nok gita re·pakbaaha. Matchok chiore biteko cha·e peke ripengtangni noko chrokna a·bachengaha.

Ripengtang se·el an·tang dedrangko ga·pretna kenchake ripengtangna aganaha, Angde, wai, angsa, wai!

Ripengtang matchok knachakgija chrokangaha. Chrokmitingon ua, Deoja sa·oja, ambare peka, chiore rim·a; mikronko kolongbak, ki·sangkolko til·ongbak ine agane ga·dengdenge ga·chokchoke chrokangaha. Indake chrokmitingon matchok se·elni bi·sa mangsako ga·pretmane siataha.

Beng·ako manigija bi·satangko sitahani gimin, se·el ka·onange matchokko bildape, ki·sangkolko til·ongbak otaha, mikron ronggnikoba kolongbak kolongbak otaha. Ua sal intalan uarang bobil ong·baaha. Indakesa da·ona kingking se·el matchokko nikode mikronko ki·sangkolko otchengesa chike cha·ronga ina.

Pekgiparang duko ga·akronga.

DO·PO

Skango, changsao, do·po an·tang degipa mangdokko rimbite, mangprakko kokprak kilko olate, Dimbil bri, Pal·wang a·dingo cha·gipa antiona re·dilangaha. Kilko

pale man·gipa paisachi uarangnan chola, ba·ra, chira, akke, na·kam, kari, ugita pilak nanga bosturangko bree on·tokgen ine do·po dedrangna aganaha. Dedrang amapet amjapet graptaitai mikotaitai paltangtangko olangenba antiona sokangaha.

Antiona sokani ruutkujaon, uarangni donggipa a·tipona adil beraru singga matma grongko pongdok palbaeng·achim. Uko niksoe do·pode namen man·na sikbeaha. Hai dedrang, ua adilko singgako sakprak pongprak bree ra·nama?

Dedrang aganaha, Damko sing·e nibo. Adilni singgani damko sing·oa, Pongprak kil kokprak ine palgipa aganaha. Uni gimin uarang kil kokdokko on·ate adil beraru singga matma grong pongdokko ra·aha.

Do·poni indake srea breako nike gipin do·orang aganaha, Aiao! nang·ni daka kamde namjajok. Ua adilni singgani damara kila topachi, e·ching kachachi sreoba breoba man·aiachim. Indita kilko magna indin gimaataijok ine saigrime jara goka solgrimaha. A·tip sachi roepaoba apsanke agane solakosa, a·tip sachi re·angpaoba inakosa man·aiachim.

Uni gimin mikil kratcha·e, bimang rasong one dedrangko songchi nokchina katdilbaaha. Salo salode songsul nokripengrangna kratcha·e nokon napchipchipe dong·dilaiaha. Atam walangosa nokil srekona ong·kate, an·tangtangni kil kokdokchi brebagipa adil beraru singga matma grongko, lu·lu·lu·lu, ru·ru·ru·ru, kokdok mangdok pongdok ine sikatskaaha.

Untalsa do·poara da·ona kingking gipin do·orangna kratcha·nike salo salo dongnue, gipinrangni tusiskamiting walosa ong·katskae lu·lu·lu·lu, ru·ru·ru·ru, kokdok mang·dok pongdok ine mikoronga ina.

Mikboke dakachi basakobade dal·bea mangsonganiko gimaata.

DO·DE

Badiaba songo man·e cha·gipa mande saksu dongachim. Uo nokna ba·gipa, mikkang bimang nitobegipa demechik saksu kamkam gnangchim. Pagipa an·tang demechikna gamchatbegipa, dam rakbegipa, pul jal de·an gagpipa miteni ba·ra kingsako bree on·aha.

Adita bilsu re·angani ja·mano, pagipa nitobegipa pante saksako chawari rimbae, do·si do·doke on·aha. Uamang bang·a salrangna apsan kusi onge dongrimaha.

Sal sao jikgipa aganaha, Anga da·alde na·tok am·na re·angnakenga. Na·a nokon dongsoaibo. Apani angna bree on·gipa ba·rako rame donangenga. Mikka waoba, balwa rakoba, stil rongmisi onoba na·ara ua ba·rako itnabene. Anga an·tangan sokbao itegen. Na·a itsoode, nang·naba angnaba dal·bea duk ong·gen; maina ua ba·rara miteni ba·rasa ong·a! Pilak katarangko agana matchotman·oa, chekke pal·kang ra·e, koksi te·jang kae re·angaha.

Chibimaona sokange adita na·tok am·angon mikka balwa rakbae, stil rongmisi onbae wababebeaha. Uko nike jikgipa ba·ratangko itna gita katbaengachim. Segipaba ba·ra sosina kenchake, jikgipa itsona beng·ang·ahaoba, bebera·bregija, ka·sin ka·sin kenchaka gnang ba·ra ramramona sepangroroe re·angaha.

Jikgipa uko adita chel·aonin nikate, Itnabe, ra·sonabe, namjawa, namjawa! ine aganroroe krenge katbaaha. Mikka balwaba rang·san sokbaaha. Una segipa rang·san ba·rako dangtape itna dakon, jikgipaba sokbae ba·rako dangtapeaha. Dangtapea baksa, Aiao! gose, an·chingde gimajok! ine jikgipa chrikon rang·san do·de bima aro bipa pil·aha. Segipa skang ba·rako dangtapchengahani gimin, segipao pul bang·bataha. Jikgipa ja·mansa dang·tapna man·eaihani gimin uo pul bang·pajaha.

Indakesa da·ona kingking do·derang mikka wanasiode, kenani ku·rangchi mikoenga ina.

Beng·ako manian ba kata ra·an pilakna bate nambata.

MIKKOL BAK I

MIKKOLMUNG NOSE DIMSE ABISA

Badiaba song damsao Nosemung Dimse abisa dongachim. Uamang mikkang bimang daknanggi-parang ong-achim. Uamang-o nogipa jonggi-parangba dong-achim.

Sal sao uamang abisa na-tok an-cheng gitna, kasi de-bikjona ine koksi te-ritak kae, chekke pal-itak ra-e chibimachi re-ange chikosakchina gitdobaengachim. Uamang-ni na-tok gitdobaako mikkol ba makre nikenba uamang-na mikchabeaha. Uni gimin uamang abisa maikai an-tangna mikchaskagen indake ua cholrangko am-beaha.

Chibimani kosakchia badiaba songni panterang nok-pantena jamsirengna wa-a den-tokengachim. Ua panterang sawa sawa wa-sing sinna changbata ine sinsusae rotokengachim. Ja-manoo uamang sinatangtango chio balboate songtangchi re-angtokaha.

Mikkol manderangni galanggipa wa-singrangni bal-bobaengako nike, Ian angni chol; haida Nose aro Dimse is wa-singrangko mikchae ra-naba donga ine gisiktango chanchie nie dongengachim.

Bean bebe, Nose Dimse abisani na-tok am-enggipa biapona wa-singrang balpakangahaoa, uamang wa-singrangko nike mikchabebeaha. Uamang saksa sak-gipinna inaha, Aia abi, toasingde nambea, aia nono, wa-sing sina silbea. Hai abi, nonona ra-na; hai nono, jojongna kolna. Chi ko-e rochina, mi song-e kal-china ine agane kolamsoaha.

Mikkol iarangko knatime dongaengachim aro abisani koldingange ra-engako nikahaoa, Angko kimna inode toasingko ra-bo, angko dongna inode wa-singtokko kolbo ine mikkol inataha.

Aganatani ku-rang gam-baa dingding niatoa, mikkol ba makre bondakosa nikataha. Tuai! tuai! nang-ni toasing-koba ra-ja, mikkolkoba dongja; hai abi galatbo, hai

nono donpilbo ine agane studapdape chichin galatpilotakaha.

Mikkolde kratchae mikgilgepgep dake dongaiaha. Indake uamang abisa chikong gni chikong gitamona na-tik am-roroangaha. Mikkolba mikil sigija ja-man ja-man ja-rikangaha.

Adita gitdoanguon, uamang bol pangsaos alchame sa-ako nikate Dimse abitangna aganaha, Aia abi, alchame sa-a wai! namnamsranga wai! bi-sarangba namnambeengenchim na-a.

Oe, uara, nono! namnambebeachim. Jojongna jille rona, nonona kal-e rona nambeenchim. Saoba uko ra-e on-na man-gipakode banggal ja-golangsikoba, rori gingchokdengengkoba chame ingenchime, angse changenchime ine Nose aganaha. Dimseba apsan aganpaaha.

Indinako mikkol knae, ki-sang doktoptope namen kusi ong-bee aganaha, Anga ra-e on-gen. Anga ra-e on-ode na-simang abisan nonosan angko donggen kimgenma?

Amak ong-oba chame inginok, mikkol ong-oba angse changinokchim ine abisan aganaha.

Uamang abisa ku-rachaksrapgijan, mikkol rang-san ki-sang doktoptope alchame sa-gipa bolgisichi maldoangaha. Alchame sa-ram biapona sokangoa ua rang-san a-kolchi an-tangni jakko sikpretataha. Alchame bi-sa donggipaona jakde sokangaha, indiba bi-sarango rim-e otbana dakoa, jakko a-palona salokbanan man-jaha. Mikkolni jakko chang-ketchangaha.

Basikmang chame mikkol? ine Nose sing-ataha.

Na-simangnamung angnamung, na-simangni jongdrang nodrangnamung chu-onga ine mikkol aganchakaha.

Basikmang chong-mot donga, chane niboching? ine Dimse aganataha.

Mangsa, manggni, manggitam, mangblok ine mikkol agane, Ha, gualahake! ine pil-taitai indaken chana dakaha.

Chang, chingaba nipana, mangsa bikotate niboching ine abisan mikkolna aganataha.

Mikkol an-tangni jakko salokna am·o am·o man·jae, Da·mo inari, chantaitaia dakaengachim.

Nose Dimse abisa gitokreng neng·pile, mikron cham·pile, nigitoe, mesokatchina ong·jaoba ra·onbachina agantaitaioa, mikkol chana daksimsime dongaiani gimin, uamang inaha, Che! chame mikkolde jak chang·ketakon! Che! chame mikkolde jak chang·ketakon!

Mikkol nama dake jakasini jakkosa gongbengbeng dakate, Iara, chang·ketjake ine mesokata dakaha. Inchi mikkolni jakde salokna joton ka·anin ripimchangpilaha. Mikkol jakko salokpilna jegita tikeloba man·jaha.

Che, chame mikkolde jak chang·ketmanchaaha, indaken salchame bi·sakoba ra·onbana man·jaengjok ine Nose aganattaiaha.

Mikkol jakasini jakkosa, Iara, chang·ketjake ine mesokattaiaha.

Indake sal do·bret ki·sang dakaona, dikteatam chanapona, mikkolni salchame ra·onbaako sengoba amchakjae, Hai nono re·ginok, imo abi doginok. Chame mikkolde, angse amakde jak chang·ketchangen re·bajajok, ong·onjajok ine abisan agangrike, Chingade nokchi re·ginok, na·a dongrikbo chamene ine agane re·baaha.

Unon mikkolde kratcha·e miksichipchip nirikaiaha. Ua da·osa an·tangni chanchininggija daka kamko gisik ra·e grapaha.

Pilakko dakna skangba mikkang janggil nichengna nanga.

MIKKOL, BAK II

MIKKOLMUNG MATCHADU JIKSESA

Mikkolni jak chang·kete dongani sal gitangipao, matchadu buchuma budepa jiksese a·a o·pate samsepe nipana ine mikkolni jak chang·kete dongenggipa biap jolona re·baaha.

Ia a-an mi misi silgen, ta-a e-ching namgen ine jiksesean ukon o-na melaaha. Intangwalo an-ching mai jumangko nikgen uko nina gita on-tisa o-pate nibo ine jikgipa buchuma aganaha.

Uni gimin segipa o-a a-bachengani pe-chengani bewal gita, O mitea, Abeta ranggea, ia a-o songdong a-chagipara, a-paksachina, chinalsachina, korako koko ole, kanako jako sale katangbone re-angbone; a-a cha-naka, song dongnaka ine miteko a-rikchengaha.

Aman apan a-song chigakode, narang kampilkode, te-brong te-gatchukode wate katjawa ine mikkolsa a-kong bo-ol bo-olchi chrike aganchakataha.

Uko knae matchadu jiksesea kene nigrike agangrikaha, Aiao! sawasai? miteanma, mandeanma? Hai buchuma am-e nina ine gam-baa dingding sandie niangaha. Adita chel-kale a-kongchi ong-onange sandiangon, chisamo chagipa bolgisioniko mikkolko nikaaha. Ha! na-a amaksa, mikkolsa chingko kenatgipa, jajrengatgipa; atamo gedamung puramung pura pue song-e cha-na gita nang-ko rim-e ra-anggen ine matchadu bolchi gakat-angaha.

Oh atchu ambi, anga na-simang ine uijaesa mangkale aganatman-aha. Kema ka-pabo. Angko chike song-e cha-panabe. Batesa na-simang angni jak chang-ketaoniko angko pue jokatode, anga na-simangni de gita su-gita dake na-simangna nokrik nokdake, game sue on-ginokchim ine mikkol mol-mole aganaha.

Atcha, na-a chingko game sue aldugen mittanggen ine ku-rachakode, chinga nang-ko jokatgen ine matchadu agane, ruachi bolko pue mikkolko jokataha. Unikoa a-ona ba-tombae an-tangtangni mesal ra-bitbaako cha-china on-aha. Mikkol kusi ong-bee cha-aha; maina sal gitamna cha-na man-jae okkribeahachim.

Mesal ra-angako cha-man ringman-oa, uamang nokona re-batokaha. Mikkolni jak ripimchangakoba matchadu jiksesean sane bane namkalataha.

Jak ripima namkalahaoa, sal sao, mikkol matchadu budepa buchumana aganaha, Aiao! atchu ambi, na-simangsa angni ma·a paa ong·a. Na-simang angko jokatjahaode angade sigimin sogiminsahachim. Ia pilakonikon na-simang angko naljokahani gimin anga na-simangna gro nanggipa ong·a. Da-ode na-simanga noko dongari cha·a raja cha·aibo, ringa raja ringaibo; pilak kamrangkon angan dakskaiginok. Angan a·ba o·gen, gamgen sugen, nokrik nokdakgen; na-simangde sal sal nokdecholo neue, rangkareo ja·sue roaibo cha·aibo. Angan aldu mittange siatgen ine mikkol aganaha. Angaba knasalde darangmarangni daka gita a·ba o·e nipana re·anggen. Mesal tarie on·atbo ine mikkol aganaha.

Pring seng·ahaoa matchadu buchuma mesal katome mikkolna on·ataha. Mikkolba ko·tip kadoreke, atte pakkol sepe, a·a o·na re·angaha. A·briona sokangon a·akode o·gija, bolsil gongdango, salakim ka·sinao asonge roarisa, A·seoni wa·ringba gongba gongba, ia angni jakba ritimba ritimba ine salgimik roaiaha; maina mikkolni jakara sosote chotomsrangahachim. Ok okkriahaoa, an·tangni mesal ra·angako cha·e roaiachim. Atam salniangon bol pangsaoni pangsaona bilrurae an·tangko neng·ate ding·olatenba, nokchina atte pakkol sepe re·angpilaha.

Nokona soke meatam cha·man ringman·oa, Angni a·a o·ade pilak darangni o·ana den·ana bate nambata. Mi misi namgen, kil gogen, ta·a, e·ching, rasin, jal·ik, merakku silgen ine ambitang atchutangna aganea dakmikaaha. Indaken sal sal mesal ra·e, atte wil·e a·bachi re·anga dakmike, bolkambeo tusie, okkrio mesalko cha·e, sal napangnasiosa nokona re·baa dakmikaiachim. Indake ja samang salko re·atangaha. Matchadu jiksesade, Da·nang angso, da·nang angde, bil cham·e jak cham·e ka·bebe o·bebeengjok ine kusi ong·beaha.

A·a so·kari ong·ahaon, da·alde songgimikan a·a so·gen ine aganon, Atchu ambia da·atamde pilak bitchri birong-

rangko tarie dontokboaha, knalde songa noka jang-ki do-ga a-a so-tokginokna ine mikkolba agana dakpaaha.

Bean bebe pringoa, mikkolba a-a so-na ina dakmike, a-bri nikwataona doange darangmarangni a-a so-ako a-kimbrio bolo gakate nigame roeaha. Atamahaoa an-tangko ding-olate nokona re-baiaha. A-a so-ade namen kamsranga kilnan nangbrejawa. Kilna nangoba sal samangsan kilna nangaigen ine mikkol aganeaha. Knal pringode mi, misi, ta-a, e-ching, me-rakku, bil-ikrangko ge-gen. Pilakkon da-awalo rite dontokbo. Maina rite ge-osa nambata, silbata. Chingni songode pilak bitchilrangkon ritchengesa ge-a ine mikkol matchadu jiksesana aganaha.

Ong-bebeengnaba donga ine matchadu jiksesa aganaha. Uamang mikkolni katako bebera-e pilak bitchilrangkon walo walgimik rite dontokaha.

Pringo pringwalnin mikkol chakate, cha-e ringe, pilak ritgimin bitchilrangko koko siktoke, mesal katome a-bachi re-angaha. Matchadu jiksesaba a-bachi re-pae ge-anirangko ge-bilbalpana aganpaaha; indiba mikkolan re-pana on-jaha. Mikkolde rong-patal namako, salakim-ako am-esa, an-tangni olanga ritgimin bitchilrangko paktame, salgimik cha-na siko cha-nga, tusina siko tusienga dake jajrenggija salko re-ataha. Atam salni-angahaosa an-tang be-en gimiko ding-makko nonge re-baaha. Indaken sal sal a-bachi re-a dakmike matchadu jiksesako togie roengachim.

Sal sao matchadu jiksesaba mikkolni a-a o-ako nipana ine an-tangtangko rimpachina mol-molaha. Mikkol ma-maantiko pa-sike uamang-ko rimangna siggijaniko mesokaha. Indiba uamang manigija re-pana am-telahani gimin mikkol aganaha, Atchu ambia, indide knalo re-bo; da-alde salchuaaha, neng-dik bakdik dakaiginok. Indine agane donange an-tangde a-bachi re-anga daktaiaha.

Burungona sokangoa gipin a-ba so-arangni agal kambatgipa biapko nie, alamala bol bi-sa, wa-a bisa rohigiparangko den-kree, misini pal saoreko, e-chingni pal gong

a·gako, ta·ani pal tal·ak burungko pikbae ge·songe donetokaha. Pilakkon matchotaha·oa chel·kalaona re·ange nigame nie, namaha ine nikoa, songchi nokchi kusi ong·e re·angpilaha.

Nokona sokangoa mikkol aganaha, Knalde angni rite ge·gimin bitchilrangni dal·ningako niaibojok. Gipin gipin bitchil ritgija ge·gipa a·barangode da·osa nabaenga, indiba angni a·baode grimgrim nikipilaiaha.

Pring ong·ahaoa, mikkol ko·tip kadoreke, atte pakkol sepe, matchadu buchuma budepana, skangskang gong·beng gongbeng re·angaha. Uni tarigimin biapona sepangoa, a·kong a·dap dakaoniko mesokate inaha, Aoa simdikdik nikatgipan angni a·ba. Matchadu budepa buchuma a·baona sepangaha ine knaoa kusi ong·beaha. Uni tarigimin a·bani sepango rong·patal ge·sa dongachim. Mikkol uamang·ko uno niwatatchina uona rimangaha.

Ambi atchua da·ode niate niboda. Gipin gipin a·ba·rangode misi, ta·a, e·chingrangara da·osa chabaenga; angni a·baoniko niboda, grimgrim nikatpilaiaha.

Matchadu jiksesa niate, mikkolni aoan a·ba ine mesokataoniko grimgrim nikatbebeaha. Aiao, bebe da·nang, angsu mikkolni aganan bebe. Miba, misiba, ta·a, e·ching, jal·ik pilakan rite ge·osa dal·ningbatbebea da·nang! ine aganaha.

Da·ode na·simang re·ange nina skode re·ange nieaiboaha, anga iano on·tisa maikoba dakrikkuna. Indinana matchadu buchuma budepa kusi ong·e a·ba manchaona re·ange niaha. Sepangmanchaona re·ange name nioara mikkol uamang·ko togibeaha ine nikaha. Pilak grimgrim ge·giminrangara burungni sam bolrangko pike ge·song·giminransan ong·aiachim ine nikaha. Uamang jiksesa namen ka·onangbeaha. Indiba mikkolde bolkambeo gakate, Ambi atchukode togieba rona man·aia da·nang! Angara na·simangni song·e rite on·atgimin mi, misi, ta·a, ta·jongrangkoara ia rong·patalosa salgimik gimik cha·e roaiachim da·nang! ine ka·dingmisiesa roataha.

Matchadu budepa buchuma ka·ara amja bilara sokja dake aganaha, Da·mo nang·koba, basakoba man·gen. Indine agane, duk ong·bee noktangchi re·bapilaha.

Bebera·ninggiparang togigiparangni duk on·ako man·ronga.

MIKKOL BAK III

MATCHADU JIKSESA MIKKOLKO A·JAK SOKA

Matchadu budepa buchuma maikai mikkolko rim·na man·gen sal sal chanchibeaha, Chanchien chanchien bon·kamao mingsa cholko dake nina mangsongaha. Matchadu budepa buchuma songni nokni manderangko okame, mikkolko rim·na uamang·ko dakchakpachina mol·molaha. Uamang·ba dakchakpana ku·rachakaha.

Sal sao matchadu jiksesean sia dakaha, aro uamang·ko nok jatchio pujua dake done songni manderang uamang·na grapa kalima dakaha. Atchutang ambitangmang·ni siaona re·bapachina gita mikkolko rimechina do·mesalko watataha.

Do·mesal mikkolni dongram biapona re·ange mikkolna aganaha, Nang·ni gale katbaani giminan nang·ni ambitang atchutangde cha·gi ringgija nang·nan sal sal kalimari grapari dongarin, saa man·e da·siwalo siangsrangaha. Uni gimin mikkang jajong mangmangkode nirikpana namniknaba donga ine su·gipa mikkolko rimee nibo ine songni manderangni aganatani giminsa angade re·baenga. Hai, re·genma? ine do·mesal mong·aha.

He! tol·asa, angko chike cha·na sike chol dakengasa ine mikkol aganaha.

Nang·ko tol·e rojaenga, songde nokde kalim grapam maiba dakpilaengjok; na·ade tol·a inesa potskaengjok.

Re-enba bolkambeomangba gakate niate nibo ine do-mesal agantaiaha.

Hat! tol-asa. Nang-ni mikkang bimangko niarin mabung dukni chinkon nikja ine agane mikkol katangaha. Do-mesalba mong-o man-jae katangpilaiaha.

Iani ja-mano do-grikko mikkolona watattaiaha. Do-grikba mikkolko gronge una ma-maanti katarangko agane uko rimaha. Indiba mikkol bebera-jaengachim. Angni mikkang bimangkoba nipabo mai, da-siwalo grape walsengani giminan angade miksik gitchakpiljok, mikron ripimpilengjok ine do-grik an-tangko mesokaha.

Unosa mikkol bebera-e, Atchu wai, ambi wai! angna kalimen, bika a-dram be-en sibebeaijok da-nang! ine mikkol grapaha. Hai, nokchi jamchi re-esa grapbo ninibo ine do-grik rimangaha.

Songona sepangangon mikkol kena mitam, kenja mitam dakesa re-angengachim. Adita chel-aoni niwatate nioa matchaduni noko mande bang-bee tom-engako nikate do-grikni kata bebe ong-chongmota ine bebera-srangaha. Ua da-o ka-dongbate nokona re-baaha. Saraona soko a chong-petpet asonge, Atchu wai, ambi wai ine mikkol grapaha.

Atchutang ambitangna ka-sabebeoa nokona jamona napesa grapebo mikoebo ine jinmarang manenga gnung aganataha. Unon mikkol nokkraona re-ange grapeaha.

Mikkolni nokona napahaoa, dama dachi, rang kram dokgiparangba, Do-gacholko peng peng, nokdecholko chip chip, kolgipuko peng peng ine dokattokon, do-gachol, nokdechol, kolgipu pilakkon peng-tokaha chiptokaha.

Unon jinma aganaha, Nang-ni atchutang ambitangna ka-sachongmotode skopangosa asonge grapepabo. Unon mikkol ambitang atchutangmang-ni skopangchi re-ange mikkangko rim-rok rim-roke grapeaha.

Mikkolni indake grapmitingo, matchadu jiksesaan mikkolni jakgitoko ket rim-e aganaha, Ha, da-osa nang-ko man-skajok. Na-a chingko togibeahani gimin da-o na-aba sina nangskaginok. Mikkol kema kapachina mol-mol-

beahaoba, matchadu budepa buchuma uko watjaha.
Indake mikkol siaha.

Papni dormaha sia.

MIKKOL, BAK IV

MATCHADU BUDEPAMUNG DO-MASKI

Matchadu jiksese mikkolni be-enko an-tangtanga cha-na sikjae, na-kam datenba, mande songchina olange, Na-kam ra-genma? na-kam, na-kam? ine agawatwate palangaha.

Na-kam palenga inako knae pilak manderangan nina chabatokaha. Indiba do-maski bachiniba bilbagalgale, budepani ola kera rikingo ba-e, Na-kam, na-kam, makre soa, makre soa ine agane mikoeaha.

Uko knae pilak manderang, Uchi makre soasana, uchi amak gransana ine agane, tuai tuai! ine studapdape katangpiltokaha. Uamang matchadu budepako, Ia songode makre soa, amak grankode cha-ja, palnaba nangja ine agane a-rikattokaha.

Uni gimin matchadu budepa songgipinchi re-angskae paleaha. Uchinaba do-maskian bilangpae apsan katako agane mikoetaiaha. Uanoba manderang ra-gija batesa uko a-rikattokpilaiaha. Salgimik gipin gipin songrangchi ole pale nioba, do-maskian ja-rikkapkapari apsan katako agantaitaie mikotaitaiahani gimin pilakoba palnangjaha.

Unon matchadu budepa do-maskiko namen ka-onangbeaha. Ua do-maskiko rim-na nangen ine chanchiaha. Uni gimin ua kerako ramao one, an-tangni seng-ki kagipa buduko enge, cha-aniko done kera rikingo ja-ga saaha. An-tanga ramasamchi burungo napsike time dongaha. Do-maski ruutgijan ua ja-ga sao nangbebeaha.

Matchadu budepa do-maskiko man-e namen kusi ong-beaha. Ua pakkol jepjepe chrokpilaha. Sala do-maskiko, amak gransa, makre soasa ine agane on-gipako; da-ode anga nang-ko angni buchumamung gal-da gisi pura

pue cha·ginok. Indine matchadu do·maskiko noktangchi rim·e re·angaha. Nokona soko a budepa do·maskini pilak kamrangko jikgipa buchumana agane on·eaha. Indake uamang sal gipino mite kitemung do·maskiko cha·na ku·monge donaha.

Pring walsengoa, pringwalnin budepa mite kritna sambasina chiringchi re·angaha. Budepa an·tangni buchumakoa gal·da gisikomung purako tarie donsochina aganange, an·tangde chiring bisiko rong·patalo sambasiarangko done chichi ki·sang ate asonge kritaha. Adita katarangko mingangon rong·koloni ang·kerong dal·gipa ong·katbae matchadu budepani ki·sangteo tapkret dake kepeaha. Matchadu budepa to·tro ong·e do·maskiko rim·ako jakwatataha. Do·maski rang·san bile katangaha.

Budepa saknaamung ka·onangamung dake, mai mancha chika ine an·tangni chakatprako gobranga gita tang·anggipachiko niame nioa, ang·kerong dal·gipakosa chenggang chenggang malengako nike, rang·san rim·emung biking kinge rong·patalo donangaha. Matchadu budeba gisiktango mitu mitu agane noktangchi re·angaha.

Dikdiksani ja·mano do·maski bilpapile nioa, ang·kerongko biking kinge rong·patalo galangako nike namen duk ong·beaha. Uni gimin ua changgitamna kingking, O mama ang·kerong, king kingkip ine agane bilsotruraaha. Changgitam indake dakon gitamgipao ang·kerong skangnin skangni nampilaha.

Ka·sae dakani on·pilako man·a.

MIKKOL, BAK V

MATCHADU BUDEPAMUNG ANG·KERONG

Ang·kerong an·tangko mangkimaatna joton ka·ahani gimin matchadu budepako namen ka·onange uko gro dingna mangsongaha. Indake ua chibimao asonge maikai

gro dingani ong·gen, kotamari rongsa, pan dagla jaksa ra·bite, uko cha·mikepe, pilak cholrangko chanchiroro·engachim. Uni indake cha·mitingo chipugam mangsa uko nike uo sing·aha, Mama ang·kerongde maiko cha·engasai?

Ang·kerong aganchakaha, Nang·ni mamara maikode man·ja, nama ine toa ine chi·a ine cha·aia angade.

Angnaba cha·e nipana on·genma wai, mama? ine chipugam bi·aha.

Matchadu budepako angni gro dingao dakchakpagen inode cha·na on·gen ine ang·kerong aganchakaha.

On·paode dakchakpagenchim ine chipugam aganchakaha. Unon ang·kerong una cha·pachina on·aha.

Dikdiksani ja·mano snaremung similchakba ang·kerongni kotamarikomung pan daglako cha·mikepe roengako nike sing·eaha, Mama ang·kerongde maikosa mikip mikip cha·engasai?

Ang·kerong aganchakaha, Nang·ni mamara maikode man·ja? Nama ine, toa ine, chi·a ine cha·aia.

Chingnaba cha·e nipana on·genma wai? ine uamang sing·aha.

Matchadu budepako angni gro dingao na·simang angko dakchakpagen inode cha·na on·gen ine ang·kerong aganchakaha.

On·paode dakchakpagenchim ine uaranga ku·rachakaha. Uni gimin an·kerong uaragnaba on·paaha.

Indake uarang ang·kerong baksa matchaduko gro dingna re·chakatangaha. Re·angmitingon ramao wa·cholkomung patchalko gronge uarangkoba matchaduko gro dinganio dakchakpachina rimangaha. Atamahaoa uarang matchaduni songskopango song niwatao mibreng jamdape walako sengaha.

Ang·kerong an·tang baksa dakgrikpana re·bagiparango sing·aha, Na·simanga mai mai cholrangchi matchadu budepako dakgrikna chanchia?

Similchak aganchakaha, Anga sim·paktipo donggen.

Chipugam aganaha, Anga rongdik ning·o timgen.

Lau patchal aganaha, Anga onggareo donggen.

Snare aganaha, Anga balkopo timgen.

Wa·chol aganaha, Anga nokdechi timsogen.

Indake walahaoo songona ong·onange biaptangtango dongetokaha.

Adita waltingangon similchak matchadu budepa buchumani tua sim·paktipo donge uamang·ko chikna a·bachengaha.

Matchadu buchuma chakchiko amjae aganaha, Aiao budepa, maiba tektak tektak chikbiake. Wa·al sike nibora.

Indinana budepa chakate nokkingoni am·pangko saloke ra·na dako, balkopo timenggipa snare tapkret chikataha.

Aiu! angkode maiba chiksrangaha! ine budepa ma·ame joljol chu·dapsikona wa·al gopako sikna re·angaha. Chudaponi wa·al ching·na ching·na dakbaon onggaloni lau patchaloni chi gao pakdapaha.

Da·ode bon·srangjok. Maiasa indake pakdapal·jok da·oa? An·chingkode me·mangsa kalakengakon ine aganenba rongdikoni merongko sate nina ine rongdik donramchi rim·ame malamangaha. Unon rongdikoni chipugam suataha. Unon budepa tengtoe ma·ame, Hai buchuma ong·kate katginok ine nokdechiko bilondilangaha. Unon sakgnian wa·chol chaksoao bu·e siaha. Indake ang·kerong matchadu budepa buchumako amaha.

Matchadu budepako a·jak soke siatna man·ahani gimin ang·kerong kusi ong·beaha. Ua aganaha, da·ode an·ching dakgrikao amahani gimin cha·e ringe kusi ong·na gita, ra, similchakmung patchal chiringchi chi ko·ebo ine watataha.

Similchak aro patchalba re·angbebeaha, indiba chi·dare gam·ani gimin kene chiko ko·gija re·bapilaiaha. Uni gimin jinmarang an·kerongkon chi ko·galgale ra·echina watataha.

Ang·kerongba chi ko·na chiringona ong·onangbebeaha. Unon ua chirimitko nikenba una mikchae, uko niarin jamangchipaha. Ua an·tangni chi ko·na re·baanikode

gualsrangaha. Ripengskarang sengsooba nisooba niksojahani gimin ka-onange snareko, ang-kerong maiko dakenga niechina watataha.

Snare chibimaona sokangoa ang-kerongni chi rikamo chadenge niwate roengakosa nikeaha. Uni gimin snare ka-onange inaha, Habab! na-ade an-tangna namgniko man-manahaoa, indake togiesa roskaake! Jinmade nang-ko sengan ampiljaengjok ine agane ang-kerongko chike siataha. Untalsa da-ona kingking snare angkeko nikode chikronga ine agana.

Maiba kamna watato dongchipakon, Ang-kerong chikoa ine ina.

Gisik grigiparangni bon-chotani duk aro gimaanio ong-ronga.

AROTATOT

Song damsao Arotatot minggipa mande saksa gngangchim. Uo Komila minggipa depante saksa bilsi brimang ong-gipa gngangchim. Pagipa ua bi-sana namen ka-sabeachim. Mamung cha-aniko cha-o ringoba pagipa ua bi-sako cha-gal ringgaljachim.

Sal sao Arotatot sagitike siaha. Uni bakdrangrangko chel-ao, sepango donggiparangko rimetokchina songni manderang watataha. Ma-drang bakdrangrangni olbaa mobaa baksanaba gipinrangba chu mi ole, matchu moe, rang kram doke Arotatotni nokona re-batokaha. Siao den-na ine mobagipa matchurangan sigipani srade gappilaiachim. Songni manderang re-bagnigiparangko sengroroe, cha-e ringe mangtutokengachim.

Wal sao mangtugiparang saksaba sari surigijan srikiritik tusimepektokaha. Mangtugiparangni tusitokmitingon Arotatotde mangchana ba nawang chana a-bachengaha. Uni skoan kilkok gita, ku-sikan asok gita, gingkolan gura gita, nachilrangan ampaltak gita, ja-a jakranga amtol gita gita dal-dalna ro-rona a-bachengaha.

Uni indake dakbaako pilakba nikjae ba uisojae, una mamungkoba daksona man·jaha. Ja·manoa nawang tuaoni asongsrangaha. Asongoa uni dal·akoa mongma bidom gita nikpilaiiahachim; skoan nokking nanggidot·pilahachim. Jak ro·ara samsara saraona, samsara nokgilona sokpilachim.

Uni ka·sabegipa depante Komilade maibakai mikrakenba, ma·gipa baksa tuaoni chakatbae, pagipa nawangni sambao chong·petpet asongeaha. Ua pagipako siaha ine uipakujachim. Pagipade nawang chae an·tangna sarao matchu den·ako, nokning·o dongarin, pujue donramo asongarin, matchu be·enko rate, sarao wa·al sike dongipao so·e cha·e roengachim. Depanteba uko nike, Angaba be·en cha·na, apa, angaba be·en cha·na apa ine bi·aha.

Angaba be·en cha·na apa, angaba be·en cha·na apa ine pagipa nawang ku·brongbrong agane sningaha.

Ua sningako Arotatotni sepangbatgipa noksulni me·chik saksa knasoaha. Ua me·chikara charanggao kilding rike roengachim. Kilding rikmitingo charangga wilwilani gimin engengut, engengut ine gam·achim. Ukoba ku·brongbrong agane, Engengut, engengut ine Arotatot sningsoaha. Unon ua me·chik Arotatot nawang chaaha ine uiaha. Ua iako mangtugipa manderangoni saksaba uijaenga ineba chanchiaha.

Uni gimin ua mangtugiparangko mikrakatna gita, Komilapa, Arotatotde nawang chaahakone, mango tugiparang ine aganwatataha.

Ukoba, Komilapa Arotatotde nawang chaahakone, mango tugiparang! ine ku·brongbrong sningsoaha.

Pil·nipil changni chang gitok delpile mangtugiparangko de·mesaatoba uamang·oni saksaba mikrakjahachim. Inchi Arotatotba jeko agana ukon ku·saba galgijan sningsoengachim.

Intangode namjanaba donga, mangtugiparange uijatelengjok ine ua me·chik chanchie, an·tang kilding rikako dongale, am·pak kinggimikko so·e, tusigiparangni kosakko salmrakjoljole nokgilchiko katangpilaha. Unosa

manderang mikraktokoa, Arotatotni mangchae matchu be-en so-e cha-engako niktokaha, aro ong-katbildange a'palchina katangtokaha.

Indiba da-nang, Arotatotni jikgipade depanteko gipake katna am-oa pagipa nawangni sambaosa dongengako nikataha. Ma-gipa maiko dakgen uisokpiljaha. Ua simang tangmang chaange, bi-satangko de-tome, nok-decholko bilone katangaha. Arotatot rang-san rim-rikna dakahachim. Indiba man-sraprikjaha.

Himangai! angni do-kling bi-sako man-rikjajok. Da-si ang baksa dongmitingon maina minoke rojajok anga ine ku-brongbrong aganrikaha. Nokoni pilak manderangan kate joktokaha ine nikahaoa, manderang nokgimikkon so-chipe galaha.

Duko ga-aknasienggipako je cholchiba jokatna tikelna nanga.

SALMUNG JAJONG

Skangode salmung jajongara abisa ong-achim. Salara abitang, jajongara jinggipa ong-achim. Jajongara nagrak dakgipa, kata manigijagipa bi-sa ong-achim. Abitang salni aganpaakode ku-keng wakeng inpile roai-achim.

Sal mikkang bimang dakuanggipa ong-achim. Uni gimin jinggipa jajongde abitangna ning-joljorde mikchabeengachim. Indiba abitang chong-mot ong-ani gimin ua mikchaako parakna pa-jaha.

Sal sao jajong an-tangui abitangko, Na-ara sana mikchapara abi? ine sing-aha.

Angade pilaknaba mikchaa dongkuja ine abitang sal aganchakaha. Na-ara sana mikchapaengade, jong? ine sal jinggipao sing-skaaha.

Jinggipa jajong ka-dingsmite adita jrip dongani ja-mano, Angade nang-na mikchaachim abi ine aganchakaha.

Uko knae abitang sal namen ka-onangbee bengbeng attachi jonggipa jajongko mikkango godape katangaha. Jajong chibimachina re-ange mikkangtango miksube-ahaoba, namedake talatna man·jaha. Uni mikkango simdikdik dak rohikamaha. Jajongo on-tisa simdikdik dakgipara abitang salni bengbeng atta godapa talgija-gipasana ine agana.

Namgija kam pangnan dongkama.

AMBI JAKBRIK

Song damsao mande saksa dongachim. Ua mandeara songsul nokripeng, ma·drang bakdrang baksa ku·mong nangrimgija a·baosa noksan dongaiachim.

Changsao ua mande jikgipako saksan noko donange antichi re·angaha. Segipani antichi re·angani walon nokni krong ja·bak dingding konggrang dakgipa joljol, mande gita dakgipa jak ro·begipa an·tang jakko sikjol-jolate, Ha ambi, jakbrik ine inataha. Jak on·atako brikjaode ua uko chike cha·gen ine kenataha. Indaken ua tusigija walgimikan brike on·e walsengaiaha.

Ua Ambi Jakbrik bima walwalan re·bae jaktangko brikatrongachim. Katnaba bachi katpagen, maina ua joljolo noksulan grichim. Uni gimin ua me·chik chaksime dongaiaha. Indake jikgipade kenamung duk man·amung tusina sikamung daken cha·na ringna sikipilgija saa ding·a man·gipa gita ram·sisi ram·dengdengangpilengjokchim.

Adita sal ruutani ja·mano, segipa antichini sokbaaha. Ua jikgipani be·en ram·beako nike, Mai saa, mai ding·ako man·jok ine jikgipao sing·aha.

Mamung saa ding·akoba man·ja, indiba maiba bima mande gita dakgipa jak gimikan kimil ro·robee chagipa, nang·ni re·angani wal intal ia nokona re·bae nokkimachi ia krong ja·bakni konggrang dakgipa gita jakko sikjolate, Ha ambi, jak brik ine on·atronga. Brikatjaode re·bae

angko chike cha-ena am-a. Angkode neng-takpanan on-ja. Nang-ni re-anga intaltal angade wal saba tusian dongkuja. Indaken cha-na ringnan nappiljaengaha. Kennaba changangpiljaengaha ine jikgipa agansoaha. Da-o nang-ni sokbaako niksoesa, janggi man-pilaha gita nikman-pilaha ine jikgipa aganaha.

Jikgipani agansoa katako knae segipa namen ka-onangbeaha. Ua salon an-tangni mil-amko matbee wil-e donsoe, seng-gnangan au miksue cha-e ringe dongsoaha. Walangahaon turam bamram biapona re-ange krong ja-bak dingding mil-am enge segipa dongsoaha. Jikgipako segipa sokbaani mamung chinkoba uiatgija, jak on-atode brikatchina, batesa jakko ro-batatorochina brikrorochina skisoaha.

Adita waltingon krong ja-bak dingding jakko snilate, Ha ambi, jak brikattai ine on-attaiaha. Indiba ua dikdiksani gisepon aganaha, Da-awalde nang baksa me-asa dongama? bachi me-sa me-asa seenga?

Ua me-chik aganchakaha, Banoni me-asa, banoni mai? Skangnin angara saksan. Indine agane jikgipa segipani skisoa gita brikataha.

Name brikoja, nang-ni jakko ro-bate snilatbo ambi, ine jikgipa aganataha.

Uni gimin ua skangna bate pakkol srek ong-pile jakko snilataha. Unon segipa krenge mil-amchi Ambi Jakbrikni jakko sotataha. Unon jak samsa chotomrikaha.

Ambi Jakbrik, Aiu, aiu! ine ma-ame a-bani a-sechi katangaha. Pringo sane niangoa, a-ba a-seo wegipa maari budu dal-gipani sikrepakosan nikaiaha.

Noksul songsulko duk apodni salonan nanga.

SADUSA SAKGNI

Song damsao Pabnamung Dangnga minggipa sadusa sakgni gnangchim. Uamang-a sadusan pilak salrangon ku-mong nangrime dongachim.

Sal sao sadusan anti re·na ine palani bosturangko koko ole, merong mechu ra·e antichi re·angaha. Uamang sal sano antiona soksrangna man·jahachim. Uni gimin sadusan dal·gipa bol pangsani ja·pango song·e rite cha·aha.

Walahaon Pabna sadutang Dangгнаo, An·chinga a·o tunama, bolkambeoma? ine sing·aha.

Angade ia an·chingni song·e cha·gipa bolni, maari wedokdrugipa mitikon tuna chanchienga angkoti, ine Dangгна aganchakaha.

Sadutang dal·batgipa Pabna aganaha, An·ching ia bol dal·gipani ja·pangon tuna, ianon ding·batgen. Un baksaba mitam mitam maarirangde mandekoba cha·a ine me·apa gitcamrang agana. Uni gimin an·chingnan namjanaba donga; sakgnian ianon a·on tusrangna.

Sadutang chongipa Dangгна ka·dingsteke aganchakaha, Angkotia maarini mande cha·ako sakdokmang nikjokma? Na·a a·o tubo, angade unon tugen. Indiba walode angade katamdapataigenne angkoti. Indake agangrike uamang tusiani somoi ong·ahaoa namnikatangtang biapo tuetok·aha. Pabna a·on tuaha, indiba Dangгнаde maari wedokdrugipaon tuebebeaha.

Adita walingahaon sadutang Dangгнаni tugipaoni chi ga·akbaaha. Sadutang dal·gipa mikrake, Maisa angkoti, katamdapatakonke ine sing·ataha. Indiba mamung aganchakgija jripjrip dongaiaha. Adita ruutani ja·mano chi ga·akbataiaha.

Che na·ade angkotide, mande mingpaja bebeke! an·tang kosako tuana sike katamdapatbebeaiake ine inattaiaha. Indiba ua mamung aganchakanikoba man·jaha. Indaken on·tiprak ruutani ja·manon daktaitaien walgimikan sadutang Pabnade tusinan man·jaha. Pring seng·ahaoa bol ja·pango an·chirarakosan nikaiaha.

Uko nike sadutang dal·gipa, Angkoti Dangгнаkode maiba chike cha·aha ine kena ong·kataha. Ua an·tangkoba ja·manode chike cha·naba donga ine chanchie kokmangkon ra·gija noktangchina katangaha.

Sadutang Pabnani katangako nikrike, sadutang chongipa Danggnani skoba a·ona ga·akbae, Angkoba sengbo, angkoti, angkoba sengbo, angkoti ine agane srapna gitik gitik tapding tapding dake skorara rikang-skaaha. Iako nike sadutang dal·gipa nipil nichagijan katangaha. Sadutang chongipani skoba aganang rikang dake rikanguaha.

Songona sokangon sadutang chongipani sko ta·a cho·ani a·kolo gipuaha. Indakesa sadutang dal·gipa jokaha. Sadutang dal·gipa songona sokange ripeng-skarangna pilak ong·gimin katarangko agane on·aha. Uni aganako knae songgimikan skoko nina re·angtokaha. Ruutgija salrangni ja·manon ua skoara kin·dik pil·aha. Indakesa da·ona kingking badiaba badiaba biaprango, Mande sko gita kin·dikko nika ine manderang agana.

Bilsu batgipani nama ku·patiako ra·chakna ba manina nanga.

WA·AL,

Skangni salrango manderang wa·al minggipakon uikuja·chim. Uni gimin song·e rite cha·a ingipakode uian uisrangkujachim. Pilak cha·anirangkon gittangsa cha·aiachim.

Changsao Susimema manderang cha·anirangko gittangsa cha·enga ine nike, ka·sachakenba wa·alko a·ningchiniko ra·echina matko watataha, maina wa·ala a·ningosa dongachim.

Mat a·ningchi re·ange wa·alko ki·metango kabite ra·babebeaha. Indiba wa·al ching·e matni ki·meko kam·prakoa, mat wa·alko sokkame ra·bana man·jaha. Ua rama tong·saon gale donangaiaha. Ia wa·alni kamani giminsa mat rokomsa matchak minggipani ki·mea gitcaka ine agana.

Mat wa·alko ra·bana man·jahani gimin, Susimema aringgako ra·echina watatskaaha. Aringga a·ningchina

re·ange, wal·minchio wa·alko so·bake an·tang ki·meo a·kol pue kabite ra·baaha. Indiba wa·al ching·e wal·misi ong·katoa aringgani janggil gimik ga·akdape kamaha. Aringga saknaako chakna amjae Songduma sagalmachina bilone, chiningchi nape katange Susimemana kene chion dongkamaha. Untal aringga chion dongna namnikbat·aha. Da·alona kingkingba aringgani wal·minchiko kabite ra·na ki·metangko pugipa a·kolko, aringgani janggilo wal·misi ga·akdape kamani brin bitek dakako nikna man·engpiti ine agana.

Aringgaba wa·alko ra·na man·jae dongchipaha. Wa·al dongjaode a·gilsakni manderangna namjawa ine Susimema uie, ua an·tangni jonggipa Katchi-Beariko wa·alko ra·e on·esrangchina watataha. Katchi-Beariba wa·alona sok·ange a·gilsakchina re·genma ine wa·alo sing·aha.

Pil·nipil changni chang re·angoba, biapona sokang·sranggijan gale katangtokaia. Uni gimin angade mik·kang rongrong bimang chongchong dakede re·angnan sokangnan kratcha·aha. Uni gimin na·simang angko rimangna nangnikchong·motode, wal·du ra·soibo, king·kang salsoaibo. Unon anga angni sadotchi sakimbalko watataigen ine agane ua Katchi-Beariko a·gilsakona watatpilhaha.

Indake Katchi-Beari a·gilsakona re·bapile, Susimemana wa·alni aganata katarangko agane on·eskaaha. Wa·alni aganata gita wal·du ra·e kingkang sale nioa wa·alko man·bebeaha. Untalsa da·ona kingking wal·du ra·e kingkang salo wa·alko man·a ine agana.

Mia misi wa·pangon, ranga gama biltangon.

A·BA TUA

Saksa nokmao nokol saksa dongachim. Nokma pangnan ua nokolna ka·sae dakrongachim. Ua una duk on·rongja, kamkoba kraa gitasa ka·ataiachim. Sao ding·oba ka·sae nirokronga sanrongachim.

Wal sao nokma an·tangni nokolko, uni miko wak cha·rongani gimin a·ba tuchina a·bachina watataha. Nokol a·baona re·ange borang rikao tue, bangsi sike, dama doke kusi ong·e roaha.

Adita waltongon sko mat bitip, ki·sang dengreng ki·tik dakgipa maiba bima borangona re·baaha. Uni mikron·rang chelosa ong·achim. Ia maiba bima nokolni tueng·gipa borangona re·bae, Hai mosa, dakgrike rona ine ku·mongeaha.

Ua mangko nikarion mandede siboka gita ong·pilaha. Ua mamungkon aganchakna man·gija dildilgokgok dongaiaha.

Hai, sako sako ama dakgike nina, mosa ine maiba bima uko ra·bitaiaha.

Unon mande ku·rang gam·bregija, Da·alde sko sabeenga, knialni atamo dakgrikna, ka·sapae sengpakubo ine mol·molaha.

Ua maiba bima aganaha, Atcha, indide knalo dakgrik·chong·motna nanggen; tol·nabe! ine agane re·angaha.

Ua nokol walgimikan tusina man·pilgija kenaha. Wal seng·ahaon, pringwalni nokchina katbae turamo tue dongaiaha. Nokgipa nokolni tue dongengako nike, Mai ong·a, saengama? ine sing·eaha.

Nokol aganchakaha, Oe, saani giminan angade a·baoni pringnin katbaiaha. Indiba ua a·bao dongmitingo mai a·selrang una ong·aha ukode on·tisaba nokgipana aganjaha. Uni gimin salo chakate roamako niko, nokgipa atamo a·ba tuetaichina ge·etaha.

Da·atamde tuena man·kujawa, angade san namsrang·kuja ine nokol aganchakaha. Uni gimin nokma an·tangan cha·man ringman·oa, sel·u ra·e a·ba tuna re·angskaaha. Nokmani borango tue wa·kap sale roengmitingo, ua apsan bimaan re·bataie, Hai, da·alde na·a dakgriknan nang·chong·motgen; mejalon na·a ku·rachakaha.

Nokma kenani giminan aganchakna man·ningpiljaha. Ua rang·san chanchiaha, Haida, angni nokolan mejalo dakgrikna ku·rachake donange angko da·alo togie watat-

skaahakon. Indake ong·ode iade angkode watjawaha. Da·o anga maiko dakgen!

Mejalo nang·ko knal atamo dakgrikna ine manchie dongipade angade ong·pajachim; angni nokolsa mejal atamode iano tueachim. Uara da·al atamde saenga ine dongrikaha. Angade ia a·bani nokgipasa, uni gimin angade na·simangni mejalni katakode mamungkoba uipaja. Angkode kema ka·pabo. Knal atamo anga ua mandekon watatgen, unon na·a un baksa dakgrikna man·gen ine nokgipa aganaha.

Indiba ua bima aganaha, Angade uija. Hai, dakgrikna, bakbak chakatbo. Bakbak tarijaode angade chike cha·sranggen.

Da·nang! nokgipa sikjaoba, draen borangoni a·ona ong·onbana nangaha. Ua sko mat bitip ki·sang dengreng ki·tik dakgipa bimani ding·ara wa·alo anga gita ding·achim. Tang·tanganin ding·ako chaksona amjapilachim.

An·ching maikai dakgrikna, skochi totgriknama, ki·sangchi jiltinggriknama? ine ua bima mandeo sing·aha.

Ki·sangchi jiltinggrikna ine ua mande aganchakaha.

Sawa jiltingchenggen, sawa chaksochenggen? ine ua bima mandeo sing·aha.

Anga chaksochenggen, na·a jiltingchengbo ine mande aganchakaha.

Atcha, na·a chaksochengbo, anga adita katange ki·sangchi jiltingegen ine ua bima adita ki·sangchi katangaha.

Ua bimani ki·sangchi katangmitingo mandede man·a dipet songtangchina bitinangaha. Adita chel·angahaoa ua ki·sangchi jiltingna janggilpile chabaaha. Mandeba uko niksoe an·tangni sel·uko sachake dongsooa ki·sango nange bu·aha.

Ai·a, na·a gol·dikko donsoa, da·nang! Da·ode donsonabeaha ine agane ki·sangchi adita chel·e katangtaiaha.

Aiao da·nang! ua bimani mandechina sepangbaon wal·sareo anga gita ding·aoni mamung dingtangjachim. Uandake ua bimani jiltingtaina ki·sangchi katangmitingon mandeba bate bate songtangchina bitinbaroroaha. Ua

bima chabao chabaode ua mande sel·uchi su·e su·e watataha. Indake walgimik dakgriken mandeba nokona soka walba seng·a dakaha. Unosa ua bimaba, Knalba dakgriktaigen ine agane re·angaha.

Da·nang! mandede noktangona soko, walgimiko ong·a pilak katarangko jikna dena agane on·arin siaiaha. Uni be·en bimang gimikko nioara wa·al kamgimin gita tapping·tokaha, aro ja·manoa wa·al kamgimin boltong gita gisimtoksrangaha.

Bebegijagipa nokolrang nokgipako gimaatani cholrangko dakronga.

DAJIPMUNG DANGGO

Changsao Dajipmung Danggo sadusa merong mechu, na·kam kari, ra·e kok ole, antichi re·angaha. Antiona sal gni belasa re·na nangachim. Uamang chibima damsaoona soko salniahani gimin unon, chibimani an·chengo mi song·e cha·aha. Ia biap burung jatchi ong·achim, sepangjolo song dongjachim. Uni gimin mi cha·man ringman·oa, bano maidake tuani ong·gen uko uamang agangrikaha.

Sadutang dal·gipa Dajip aganaha, Angkoti, ianode sin·begen; maina chisam ong·a. Uni gimin wa·al so·e tuna gita, hai an·chinga da·on seng·mitingon boltong am·e donna.

Sadutang chongipa Danggo mi okkaahani gimin boltong am·na aratjok. Ua aganaha, Ia an·chengan ding·a, ianon konge tue wal sakode re·atainaha, angkoti; maina neng·ma dikma boltong am·e, ripee roaenggen.

Sadutang dal·gipa aganaha, Na·a gong·jaoba, angade boltong dane so·esa tunaka ine agane boltong ripena burungchi re·angaha. Dajipde walna skangan adita boltongrangko dandakbabebeaha.

Walangon sadutang dal·gipa Dajipde an·tangni boltong dandakgiminko dane so·e tuaha, indiba sadutang chongipa Danggode an·chengo konge tuaiaha. Aditana kingking,

wa-al jelsrangkujana kingking Dajip sin·ana kom·tote tuna nangaha. Ua sin·beana kom·tote tue inaha, Gangga ganga bora.

Sadutangni indake aganengmitingo Danggode an·chengo kite tue ding·ako man·engachim; maina atam·chi barasan ong·aengnani gimin an·cheng ding·kueng·achim. Uni gimin ua, Ka·tong bu·ul bu·ul ine inatskaaha.

Ađita waltingangoa, sadutang dal·gipaba, wa·al sika jelbaahaoa, ding·ako man·e tusinapangaha. Indiba sadutang chongipade waltingahani gimin an·cheng chigadoe sin·ako chakna amchakpiljae sibokangskaaha. Sadutang dal·gipa simaksa tusiaoni mikrake, Gangga bora ine inattaiaha. Sadutang chongipa mamungkoba aganchak·jaha. Una mai ong·aha ine re·ange nioara, sin·a nape sadutangni sibokakosa nikeaha.

Angkoti, angkoti ine de·mesabeahaoba ua uijaha.

Uni gimin sadutang dal·gipa an·tangni wa·al sikaona uko de·tomange wa·alo angeaha. Ua wa·alo walgimik seng·nasipile angahaosa tangchapilbaaha. Indake wal seng·ahaoa, uamang antichiba re·angsranggija songchi nokchi re·angpilaiaha.

Aratgipa mande dukko grongninga.

AMBARE SEGIN

Changsao Jeng minggipa pante saksa, sal ding·beani salo Nokse minggipani noko ambare segin su·kningako okkae cha·aha. Cha·manoa ua chi ringna sikbeaha. Uni gimin ua Nokse minggipa me·chiko chi ringna bi·aha. Nokse una chi lau sa ra·bae on·eaha.

Jeng chiko ringaton ua chi chi·bea ine nikaha. Ua aiao inmane pil·e groksa ringate nitaiaha, indiba ua chi chi·chongmotachim. Indake ua lau sako bon·toksrang·kujana kingking ringangaha.

Jeng gisiktango chanchiaha, Aiao! iamang-ni chia mini mini ringade indake chi-jachim! Da-al Nokseni chi de-e on-ade maiki chi-bia! Da-nang, ua ambare segin cha-e chi ringode chiko chi-nika ine uikujachim. Uni gimin ua Noksean chiko chi-atgipa ong-akon ine chinchie, uko kimode pangnan ua chi chi-ako ringrongna man-genchim ine untal una gisik nangaha. Indake ruutgijan me-chikni mama adarang uamang-ni mikchagrikako nike uamang-ko do-si do-doke on-aha.

Sal gipinoa Jeng Nokseko chi ringna ra-echina ge-etataha. Jikgipa Nokseba segipana lauo chi rue ra-eaha. Ua da-anpakoba Nokseni chi ra-baa chi-chongmotgen ine ka-donge adita ringataha. Indiba ua chi chi-jahachim. Uni gimin ua gisiktango aganaha, Skangode Nokseni chi rue on-ara chi-beachim, unasa anga kimpaachim, da-ode maina chiba chi-jaha! Ihing, ia me-chik angko man-na mangmangsa togiaha. Anga ia noko dongjawaha ine chanchienba jikko gale katangaha.

A-selko sandichenggija mamungkoba rang-san dakna nangja.

GAME CHA-GIPA

Saksa a-pal game cha-gipa mandeo matchu harisa, gure mangsa gnangchim. Ua mande wal sao uni turam skopangona miteni re-bae indine aganeako knaaha. Na-a pilak a-o rogipa, chio donggipa, sako bilgiparangni ku-sikko uina man-gen. Indiba nang-ni uigiminko na-a sanaba aganskae on-ode, na-an sigen.

Indake wal sao ua biapo tusina tue dongengmitingo, uni matchurangmung gureni agangrikengako knaaha. Matchurangoni mangsa gurena inaha, Ripeng na-ade chingna bate kusi ong-batenga. Chingade pringoba waltingengaonin chakate sal tong-saona kingkingan hal gamna nanga. Tusinan suk ong-e man-paja, okkae cha-

naba man·paja. Indiba na·ade sal sal roari kusi ong·cha·aenga.

Unon gure aganchakaha, Ripengrang angni agana gita dakbo. Knal pringo nokgipa hal gamna ine na·simangko mona re·baon na·simanga ku·chi bokbak bokbak dake saa daksobo. Unon nokgipa na·simangko hal gamna moangjawa. Na·simang indake pringsamangmang neng·takpana man·gen.

Unon nokgipa ka·dingsike gisiktango inaha, Na·simangni agangrikani katarangko angaba uitoka. Knal pringosa uiaigen.

Pring seng·ahaoa nokgipa matchu gohaliona re·ange nioa, matchu manggnikon ku·chi bokbak bokbak dake saa dakengako nikebebee, Atcha, na·simangde da·al pringde saenga, hal gamna man·jawa; indiba gure sajaenga, uni gimin ukon na·simangni pal gamatskana nanggen ine agane, gureko salgimik hal gamatskaaha.

Atamo gohaliona napbaahaoa, gure matchurangko inaha, Na·simangko saa dakbo ine skiai skijai an·tangsa neng·skime gamskana nangaijok. Hat! knal pringde saa daktainabeaha.

Uarangni indake agangrikengako knae nokgipa ka·dingsobeaha. Unon jikgipa, Indin dongari maina ka·dinga ine segipao sing·beaha. Indiba segipa miteni agana gita sina kene jikgipana uni ka·dingani mangsong·aniko aganjaha. Indiba jikgipa graptaitai, Maina indin dongari ka·dinga? ine sing·chaaha. Uni gimin segipa duk man·pile maiko dakgen ine pring seng·ahaon noksamchi katange ku·bososo dake asonge dongaha.

Uni indake duk man·e maiko dakginok anga ine chanchimitingo, do·bipa mangsa do·bima mangdokko rimbite uni asonge donggipachipakan cha·amdilbaengako nikaha. Unon do·bimarangoni mangsa do·bipao sing·aha, An·ching nokgipade da·alde maina duk man·a gita dongengasai?

Do·bipa aganchakaha, An·chingni nokgipa an·tangni matchu aro gureni agangrika katarangko knae ka·dingaha.

Uni gimin jikgipa maina ka-dinga ine walgimik sing-chaaha. Ua a-selko agane on-ode ua da-on sigenchim; uni giminsa maiko dako namginok ine chanchie duk man-enga. An-chingni nokgipaan goka, jik saksamang-mangkon sason ka-na manjae sinasienga. Angko niboching, angni jikgipa mangdok gngang, uko anga sason ka-na man-enga. Hal gamani loruko nokkingoniko ra-one nom-bokpile sing-taijawaha ine ku-rachakate dokaiboching! unon uigen ine do-bipa aganangkuaha.

Uko nokgipa knae, Oe bebe, nang-on jik mangdok gngang, ukon na-a sason ka-na man-a. Indiba angode jikgipa saksasan dongaia, ukon angade sason ka-na man-jae an-tangsa sinasienga. Uni gimin anga do-bipani agana gitan dakna nanga ine agane nokkingoni loruko ra-one jikgipako da-ontaltal sing-taijawaha ine ku-rachakate dokbeaha. Indake dakesa ua signioni jokaha. Changgija uisokgijachin mande duko ga-akronga.

MAT AN·CHI PILA

Skangni chasongo, Susimemani Sanggildomani sian bon-an salo a-o malgipa, chio rogipa, sako bilgipa pilakan ua siaona re-batokaha. Ia re-bagiparangoni mitam ganchi rikaha, mitam chu cheke kanaha, mitam mi bijak song-aha, mitam mango dongtimaha, mitama wak matchu rataha. Indiba matde mamungba dakpagija chu ringari, wak be-en so-e cha-ari roaiachim. Chu pekahaoa chrok mesaari dongaiachim.

Mat mi bijak song-giparangchi, chu chekgiparangchi, ganchi rikgiparangchi, wak matchu doke ratgipa tetgiparangchi, mango dongtimgiparangchi re-jojoe gotilek gosiltek dake chrokjollolaiachim. Ua beng-akoba kang-akoba manijachim.

Indake wak matchu greng gitakgiparangchi beng-ako manigija chrokangon mat ki-meni ku-chotko den-sotat-

manaha. Indiba matde an·tang ki·me chottomaha ine uijae, pilakchin ki·me songdodoe gotileke chrokaengani gimin pilakon uni an·chi kikia gita nangtokaha.

Untalsa da·ona kingking maiba bang·gija man·aniko on·tiprak suale cha·akon, Mat an·chi pila gita ine agana.

DO·BOKMUNG PERU

Skangni chasongo do·bokni atchu ambi peruni atchu ambioniko karapni salo misi kok dok, mi tora dokko ra·chakaha. Ja·mano do·bokni atchu ambi an·tangtangni ra·chakgimin mi misiko chotna man·gija siangaha.

Uni gimin da·ona kingking peruni de su·drang do·bokni de su·drangoniko gro rike, perurang do·bokrangko nachilo chikkape burungchina salange chike cha·ronga ine agana. Peru nachilo chikkapesa do·bokko salangai·aoba, do·bokrang ku·samangba mikorongja. Uarang jechina salanga uchinan joljol re·angaia. Ukoara ma·gitcham pagitchamni gro dakangani a·sel mikoja ine manderang agana.

Uni gimin tangmiting nammiting salrango gro dakna nangja. Gro jinang dake siangode jik dedrang, deritchu su·ritchurangna namja.

ME·MANG

Skango Gongja minggipa mande saksa an·tang noksulni jikgipani siao mangtupaaha. Atamode pilak manderangan chu ringe chu peke dongtokengachim. Waltinganon pilakan tusiangtokaha. Gongja saksasan tusigija donga·engachim. Gongjade tusipana joton ka·beahaoba, tusipana man·jahachim.

Adita waltingangahaoa, ua kenna a·bachengaha. Kenako chakchikoba amchakjae, turimska ripeng·skarangko de·mesaoa saksaba mikrajaha. Se·etoba,

puchinoba mikraktokjaha. Gongja maiko dakgen uija-pilaha. Ua chakate noktangchi katangna chanchiaha, indiba me-mang ja-rikangpanaba donga ine kenaha. Uni gimin ua jinma gitan tusia dake dongaiaha.

Adita dongon sigipa mande an-tangko pujuramoni chakate, sal-a ra-e an-tangni nok gimikko itrokangaha. An-tangna mangtuenggipa manderangni kosakmangkoba itrokangaiaha. Uko nike Gongjade namen kenbeaha. Indaken an-tangni samtangtango tugipa manderangkode chikamung ku-akamung dake de-mesaaha. Indiba ua uamang-ko mikrakatnan man-jaha.

Nok gimikko itroka matchotahaon, ua an-tangna mangtugipa manderangni ku-sikrangko chitkreke chitkreke wagam channa a-bachengaha. Uandaken sulsul chanba-engachim. Gongja uni chananirangko mikchipe knatim-engachim. Me-mang indake chanengachim, Asa, agin, jora, jogin, mina, kawa, oktem, padura, olasi, choket ine sakantini wagamrangko chanbaaha. Gongjani sepang-ona sokoa, ua an-tangkoba chanangchina ine ku-ange wakengsisi wagamrangko naate dongsoaha. Me-mang Gongjani wagamrangko jaksirangchi ge-sa ge-sa rim-e, Asa, agin, jora, jogin ine chanangmitingon Gongja me-mangni jaksiko chikpretataha. Unosa, Hei-i-i ine chrike pujuramtangona re-ange dongepilaha. Me-mangni chrikani gimin pilak mangtugiparang tusioni mikraktokaha.

Indaka agananirango A-chikrang me-mangna kenbea aro bi-sarangko iarangko agane kenatronga.

Kenatara ka-donganiko gimaata.

ANG-KE

Badiaba songo mande saksa gnanchim. Un baksa uni jik aro uni ka-sabegipa depante saksa, rama gong-rakbagimin, gnanchim. Uamang a-bao takiengachim.

Sal sao pagipa antichi re-angaha. Re-chakatna skang ua depantena, Anga lol lolchi re-angnane; anga nang-na

ba-ra, mitai ra-banane. Na-ara angko sreko nisobone
ine agane re-angaha. Antiona re-na sal gni nangachim.

Pagipani re-angani ja-manóa, bean bebe ua bi-saba
pagipani agananga gita salantin sreko nisoé okamrong-
achim:

Apa wai, baba wai, apa wai,

Chola ba-ra ra-babo, mitaikoba ra-babo.

Chia dal-a inode, ringbanggio chobabo,

Rama dika inode, do-do pil-e bilbabo.

Pring sao ma-gipa aganaha, Da-alde nang-pa anti
sokbaginok, name nisobo. Bi-sa kusi ong-bee skang
salrango gita sal tong-saona kingking sreko chadenge,
chikoramchipak mikkange nisoaha. Ja-manóa neng-a
amchakjae, Apa sokbakuja, on-tisa tusikuna ine agane
tusiangaha.

Sal napna skangan pagipa kok ole chigatang chidareona
sokbaaha. Chigatangona sokbaóa, Au miksue re-na ine
ua kokko one au miksuaaha. Aumitigo rong-patalo
ang-kerong dal-beani gungguang gungguang malengako
nike, an-tang depante so-e cha-china ine grong ake ja-si
pe-e ra-aha. Pagipani grong ja-si akmiting pe-mitingon
depanteba, Ai-a, ja-a jak saa, Ai-a, ja-a jak saa ine
chrike janggi galaha. Da-nang, ma-gipade grape gipake
dongaiaha.

Pagipa nokona sokbaóa jikgipani depanteko gipake
grapako nike, Mai ong-a? ine sing-eaha. Jikgipa depante-
gipani pilak kamrangko grap grape segipana aganaha.

Unon segipa depantena mai ong-aha uko uiaha. Ua
grape aganaha, Babara ang-ke pil-esa angko chidareo
nisoakonchim, da-nang! Angara uijajok. Himangai,
angan babako so-otmanjok!

Untalsa A-chikrang bi-sarangni tusimitingo guk, jo-ong
mamungkoba so-otna on-ja. Maina A-chikrang mande-
rangni jama janggi tusimitingo guk, jo-ong ba ugita
ma-manti bimang pil-e roama ine bebera-a.

Kenatachi mandeko bebera-draata.

DEPANTEKO DINGDINGANI

Ding dedea, dede gring changdinga, ding dedea!
Sara samsi ro-dinga, ding dedea!

Do-ma gita bilangbo angdene,
Rangsi gita weangbo angsane.
Angni chata a-wea dedea,
Angni rejak dikila apara.

Matcha helbikbikana ba-a dedeko,
Do-reng gakasiaona neng-a do-mako.
Nang-na mil-am sel-une, dedene,
Nang-na sepi kangsari angsane.

Bobilna skang chilna ba-jok dedeko,
Matchana ja-manchakna neng-jok angdeko.
Sio so-nakgipajok angdea,
Gano cha-nakgipajok do-mara.

Gitingni salakimo ja-nengtakbone,
Ranini durubolo ba-e gisikbone,
Apara, do-mara, Rangsia.
Ding dedea.

DEMECHIKKO DINGDINGANI

Amara, ta-mara, gitinga, rania, ding dede ding!

Ang ta-ma tagitting bitchrina ge-gipa,
Ang mema rongtambing, rongjanggina dongipa.
Ta-ma gita jelangbo, dedene,
Giting gita silangbo ranine.

Dede menil achari, ding ta-mara,
Angde giting balmisi ding dedea.
Duru bolna ba-ara ta-mako,
Nokbichongna dinara gitingko.

Song·o me·dik sronge chanbo amane,
 Ito sal·a ma·gape itbo ta·mane.
 Chratangna chuchekna kea amako,
 Depantena wak dokna saa raniko.

A·bakuo a·gamna ba·a angde, ta·mane,
 Sa·sampangō misuna neng·a angsaa gitingne.
 Na·chi bitong imbongra cha·bo amara,
 Ang·ke grong jakrako kal·bo ta·mara.

Amara, ta·mara, gitinga, rania, ding dede ding!

MITAM AGANME·APAA NIRANG

Chonmitingo do·chokna dol·a,
 Kuro siko bolgrona sol·a.

Mia misi wa·pango,
 Ranga gama biltango.

Salna jaksi on·e,
 A·na kang·kare gonge.

Mikka bitchi ringe,
 Ruat nade gane.

Salo ramo ran·jajok,
 Chio su·o taljajok.

Cha·na ino a·nama,
 Chuna ino mesenga.

Jika dea bobil,
 Ma·a noa ja·dil.

Mia misi ga·gong,
 Mandeskan saljong.

Silskako silchi sika,
 Miskako ginde pua.

Ma·na nona ok,
Jikna dena kok.

Ma·na nona manggol,
Jikna dena ki·gol.

Gipinchi do·de gitok,
An·tangchi ki·sing gitok.

An·tangan do·bok,
An·tangan kilkok.

Wachi soko aringga chaka,
A·rak soko timati bita.

Achak kore chamanjok,
Wal·ja ga·tingdelmanjok.

Doko janggil sagija boljanggil,
Ino nachil songgija wknachil.

Mikkangchi doko janggilchi saa,
Janggilchi doko mikkangchi saa.

Den·na ino attetang,
Kimna ino ma·detang.

Maran ja·skuo tangchaa gita,
Te·sok noksurio wegaa gita.

Oko ki·ari,
Peo gingari.

Ja·gidote ja·mata,
Nigidoe miknapa.

Mika skal,
Ja·a kadal.

Do·bima bitchi ringa,
Mapu deminoka.

Bolchong agal gita,
Do·ka manggisim gita.

Do-krusa elgingim,
Kimprasa bokdimdim.

Nisoo matcha mikkang,
Re-pako do-bok merang.

Mikil jamgop pina,
Ki-sang medop kaa.

Wa-se besa kaia,
Dalne mejolaia.

Grongan a-mang nangja,
Ki-mean samte ba-ja.

Songo giting pangsani,
Nio mongma mangsani.

